

Ammasumik ataatsimiinnermi oqaluuserisassat:

Imm. 1.1 Oqaluuserisassat akuersissutigineri

Aningaasaqarnermut tunngasut:

Imm 3.1 Qeqqata Kommuniata Kalaallit Nunaannilu Namminersorlutik Oqartussat akornanni 2026-mi Majoriamik ingerlatsineq pillugu isumaqatigiissut pillugu ilisimatitsissut

Suliassat nalinginnaasut

Imm. 4.1 Ukioq atuarfiusumut 2024/2025-mut Qeqqata Kommunianut atuarfinnut pitsaassutsimik nalunaarusiaq

Imm. 4.2 Atuareernerup kingorna ornittakkamiittarneq SIS

Imm. 4.3 Meeqqanut inuusuttunullu 18 inorlugit ukiullit akeqanngitsumik timersorsinnaanerisa nalilersoqqinneqarnerat

Imm. 4.4 Napasumi meeraateqarfiup ininit attartukkanit kommunip illuutaanut B-125-mut nuutinneqarnera

Imm. 4.5 Kangerlussuarmi sivisussusilerikkamik atorfinitsitsineq

Imm. 4.6 Atuarfik pillugu Inatsisartut inatsisaata allanngortinneqarnera pillugu Inatsisartut inatsisissaattut siunnersuut pillugu tusarniaassut

Imm. 4.7 Qeqqata Kommuniani 2025-imut ukiumut nalunaarusiaq aamma 2026-imut meeqqerivinnut ukiumut pilersaarutit

Paasissutissiissutit:

Imm.6.1 Qeqqata Kommuniani januarip 2026 naanerani suliffissaaleqineq pillugu paasissutissiissut

Imm. 6.2 Avataanit tikisitsilluni sulisussarsiornermik, december 2025 aamma januar 2026-imi qinnuteqaatinut tunngatillugu, ataatsimiititaliap siulittaasuanit aalajangiiffigineqartut pillugut paasissutissiissut

Imm. 6.3 Illoqarfimmi atuarfimmuut ornigutinnikkaluarluni alimasissumit atuartinneqarnissamut toqqaanissamut periarfissaq.

Tamalaat:

Imm. 7.1 Tamalaat

Ataatsimiinneq allarteqqippoq nal. 13:00

Peqataasut:

Siumut

Evelyn Mølgaard

Siumut

Charlotte Olsen

Inuit Ataqatigiit

Juliane Enoksen

Naleraq

Karl Lyberth

Nalunaaruteqarlutik peqataanngitsut:

Demokraatit

Erne Olsen

Nalunaaruteqaratik peqataanngitsut:

Naleraq

Steffen Johansen

Imm. 1.1 Oqaluuserisassat akuerineri

Aalajangiineq:

Imm. 6.3 ataatsimiinnerup tullissaanut nuunneqarpoq, allagaq ilanngutassaq amigaatigineqarmat. Taassuma saniatigut ataatsimiissutissat akuerineqarput.

Imm. 3.1 Qeqqata Kommuniata Kalaallit Nunaannilu Namminersorlutik Oqartussat akornanni 2026-mi Majoriamik ingerlatsineq pillugu isumaqatigiissut pillugu ilisimatitsissut

Journalnr. 51.10.01

Tunuliaqutaq

2022-miit atuutilersumik Majorianut naammassisanut isumaqatigiissutit ukiunut pingasukkaanngortinneqarput, siusinnerusukkut ukiut tamaasa naammassisanut isumaqatigiissutit pillugit isumaqatiginninniartoqartarnikuulluni. Tamanna isumaqarpoq, suliassanik allannguinerit siunissami ukiut pingasukkaarlugit isumaqatiginninniutigineqartassasut, paarlattuanik ingerlatsinermut tapiissut suli ukiut tamaasa isumaqatiginninniutigineqartassalluni, taanna aningaasaqarnermut inatsimmik pinngitsuuisinnaanngimmat. Anguniagassat pillugit isumaqatigiissut atuuttusoq 2025-2027-mi atuutissaq.

Maleruagassatigut tunngavigisaq

Suliffissanut, ilitersuisarnernut pikkorissaqqinnernullu qitiusumik ingerlatsiviit pillugit Inatsisartut inatsisaat nr. 28 ulloq 9. december 2015-imeersoq.

Pissutsit atuuttut

Ingerlatsinermi tapiissut aningaasaqarnermut inatsimmit pinngitsuuisinnaangitsoq angusassanut isumaqatigiissummi suliassanut tunngassutilinni angasussanik Majoriap angusimasai malillugit ukiut tamaasa aalajangersarneqartarpoq ukiunilu pingasuni atuuttusarluni.

Atuilluartuunissakkut kingunerisinnaasat

Suliffeqanngitsunut suliniutissat piaartumik aallartisarneqarsinnaappata pitsaanerussaaq, taamaalillutimmi suliffissaaleqisut ingerlariaqqinnissaminnut pitsaanerusunik periarfissaqalissapput.

Aningaasaqarnikkut allaffissornikkullu kingunerisinnaasai

2025-mut sanilliulugu atuartut amerlassusaat 175-miilluni taamaaginnarpq. Taamaattorli tapiissutit 2025-mi 3.635.344 koruuniniit 2026-mi 3.695.012 koruuninut 60.000 koruuninik qaffariarsimapput.

Majoriaq 2026-mut ingerlatsinermut tapiissut pillugu isumaqatigiissut pillugu eqitsit

Eqitsit 1-imut eqitsit	Tapiissutit		Atuartut
	kr.	Utertitsitat	amerlassutsit
Ingerlatsinermut tapiissutit Maniitsoq	1.630.219		60
Ingerlatsinermut tapiissutit Sisimiut	2.064.793		62
Katillugit	3.695.012		175

2026-mut ingerlatsinermi tapiissutit tamakkiisut 3.695.012 koruuninut naatsorsorneqarnikuupput.

2026-mi februaarip aallaqqaataanni ingerlatsinermut tapiissutit tamakkiisut 70 procentiatut annertussusillit 2.586.509 kourunit ikineqarput.

30 %-ii 1.108.504 koruunit ukiup 2026-p sisamararterutaani kommunip angusassatut isumaqatigiissutaasut naammassissimassappagit ikineqassapput.

Ingerlatsinermut tapiissutinik illoqarfikkaartumik agguataarneqarnera missingersuutaannaavoq.

Illoqarfinni assigiinngitsuni pisariaqartitat aallaavigalugit tapiissutit kommunimit agguaanneqarsinnaapput.

Piffissaagallartillugu nassuiaat kommunalbestyrelsip nassiutinngippagu imalunniit amigaateqarpat, ingerlatsinermut tapiissutip 30 % sinneruttut uninngaannartinneqarsinnaapput.

Allaffeqarfiup naliliinera

Allaffeqarfik naliliivoq, 2026-mut Majorianut ingerlatsinermut tapiissutit pillugit Qeqqata Kommuniata aamma Kalaallit Nunaanni Namminersorlutik Oqartussat akornanni isumaqatigiissut kommunimut akuersissutigissallugu naammaginartuusoq.

Innersuussut

Ilinniartitaanermut ataatsimiititaliamut innersuussutigineqarpoq

- 2026-mut Qeqqata Kommuniani Majoriamut ingerlatsinermut tapiissut pillugu ilsimatitsissut tusaatissatut tiguneqassasoq, aamma
- ingerlatsinermut isumaqatigiissut borgmesterimik atsiugassanngorlugu ingerlateqqinneqassasoq.

Aalajangiineq:

Tusaatissatut tiguneqarpoq, borgmester Malik & Evelyn atsiugassatut tigussavaat.

Ilanngussaq:

1. 2026-mut Majoriamit ingerlatsinermut tapiissutit pillugit isumaqatigiissut

Imm. 4.1 Ukioq atuarfiusumut 2024/2025-mut Qeqqata Kommunianut atuarfinnut pitsaassutsimik nalunaarusiaq

Journal nr. 51.00.21.02

Tunuliaqut

Ukiut tamaasa atuarfeqarfiit oktobarip aallaqqaataa nallertinnagu pitsaassutsimut nalunaarusiortarput. Pitsaassuseq pillugu nalunaarusiap imarivaa ukioq atuarfiusoq kingulleq pillugu paasissutissat. Pitsaassutsimik nalunaarusiat paasissutissartaat pingaarnerit katersorneqartarput, pitsaassutsimut nalunaarusiamut ataatsimut katersorneqarlutik.

Maleruagassatigut tunngavigisag

Atuarfik pillugu Inatsisartut inatsisaat nr. 15, 3. december 2012-imeersumi § 49 imm. 2.

Pissutsit atuuttut

Allaffeqarfiup pitsaassutsimik nalunaarusianit paasissutissat katersorlugit ataatsimoorussamik pitsaassutsimik nalunaarusiannngortinnikuuai. Atuarfeqarfimmi suliniutissat eqqartorneqarnissaanni, ataatsimoortumik pitsaassuseq pillugu nalunaarusiaq atorneqartariaqarpoq. Pitsaassutsimik nalunaarusianit oqariartuutit pingaarnerit saqqummiunneqarput ugguuna:

Pitsaassutsimik nalunaarusiami eqikkaaneq

Atuartut akornanni atuagarsornikkut piginnaasat qaffassarneqarnissaat anguniarlugu alloriarfinni inaarutaasumillu misilitsinnerit inernerit ukkatarineqarput. Atuartitsissut Matematikki nukittorsaaviginarlugu, atuartitsissummi matematikkimi atuartut piginnaasaasa / angusaasa naggataatigut pitsanngorsaaviginarlugit, atuartitsissummi Matematikkimi piginnaanngorsaasoqarnissaa (Matematikkimi atuartitsisut) pillugu Kalaallit Nunaanni Ilisimatusarfik (ilinniartitsisunngorniarfik) Nalunnguarfiup Atuarfianiit januaari 2025-miit suleqatigineqalerpoq. Taamatuttaaq Minngortuunnguup Atuarfiani Matematikkimi ilinniaqqinneq ingerlanneqarpoq – periutsillu ilikkarnernerit eqqunniarneqarlutik. Matematikstrategi siammarterniarneqarpoq. Nukarlerniillu toqqammaviliineq aallarnisarneqarluni.

Tamatumuunalu paasinaqqissaarnermi pikkorissarnerit ingerlanneqarput aammalu atuartut atuarnissamut unamminartuutillit paasineqarnerulerlutillu ikiorneqarput. Ilaatigut qallunaatut atuarnermi ikiorneqarlutik.

Pitsaassutsimik nalunaarusiami siuliani kommunip karakterinut agguaqatigiissitsinera suaassutsinut sanilliussilluni aggulunneqarsinnaasimavoq, uanili Kalaallit Nunaanni naatsorsueqqissaartarfimminngaanniit kisitsisit pineqartumut ukioq atuarfiusumut nutarterneqanngimmata pitsaassutsimik nalunaarusiami tamanna misissoqqissaarneqarsinnaasimanngilaq. Amerlasuutigulli diagrammini nalinginnaasumik niviarsiaqqat nukappiaqqaniit atuartitsissutini tamani oqaluttariarsornikkut allattariarsornikkullu ajunnginnerumik angusaqartartut takuneqarsinnaavoq.

Tassani nukappiaqqaniit atuartitsissutini tamani niviarsiaqqat allattariarsornikkut ukiumoortumik karakteriginnerusarlutik. Aammattaaq nukappiaqqaniit atuartitsissutini tamani niviarsiaqqat oqaluttariarsornikkut ukiumoortumik karakteriginnerungaartut takuneqarnikuuvoq.

Alloriarfinni misilitsinnerit inernerat

Alloriarfinni misilitsinnerni inernerit takutippaat, Qeqqata Kommuniata atuarfii atuartitsissutitut alloriarfinnullu tamanut agguaqatigiissinnerisa takutikkaat, atuartitsissutini matematikkimi

atuartitsissummilu qallunaatoornermi ilinniarnermi sulii pitsanngorsaalluni suliaqartoqartariaqartoq, inernerit takutimmassuk taakku suliaassat affaat sinnerlugit kukkusumik suliarineqarsimasut.

Pitsanngorsaaniarluni sulineq ingerlavoq, aatsaallu piffissami qaninnermi aallartisarneqarluni, tamaattumillu inernerit malunnaatilimmik pitsanngoriarneri sulii takuneqarsinnaannginneranut peqqutaasinnaanera ilimanarpoq.

Illoqarfinni atuarfinni 7. klassinut atuartitsissutip matematikkip ataani agguaqatigiissitsilluni kisitsit appasinnerpaaq 35-usoq Atuarfik Kilaaseeqqamiippoq. Illoqarfinni atuarfinni 7. klassinut atuartitsissutip tuluttoornerup ataani agguaqatigiissitsillunilu kisitsit qaffasinnerpaaq 85-iusoq Minngortuunnguup Atuarfianiippoq.

Atuarfik Kilaaseeqqami 3. klassit 7. klassillu amerlanersaat atuartitsissutini tamangajanni suliaassamik affaat kukkusumik akinikuuvaat. Tamannalu agguaqatigiissitsinnermut apparsaataavoq.

Nalunnguarfiup Atuarfiani 3. klassit 7. klassillu suliaassat affangajaat affaalluunniit sinnerlugit annerusumik minnerusumilluunniit eqqortumik akinikuullugit.

Soraarummeerluni misilitsinnermi inernerit

Kalaallisoornermi Nalunnguarfiup Atuarfia agguaqatigiissitsinnermit qaffasinnerulaarluni pitsaanerpaamik ingerlavoq aammalu illoqarfinni atuarfiit tamarmik kalaallisoornermi piginnaasanik misilitsinnermi qaffaseqatigiipput.

Piginnaasanik misilitsinnermi tamani appasinnerpaamik agguaqatigiissitsinnermiilluni qallunaatut piginnaasanik misilitsinnerit allaanerupput, tamatumani Atuarfik Kilaaseeqqam appasinnerpaamik agguaqatigiissitsinnermiilluni. Minngortuunnguup Atuarfia aamma Nalunnguarfiup Atuarfia ajunnginnerulaartumik angusaqarput.

Matematikkimi Nalunnguarfiup Atuarfia qaffasinnerpaamik agguaqatigiissitsinnermi angusaqarpoq, tassani Minngortuunnguup Atuarfia aamma Atuarfik Kilaaseeqqam appasinnerusumik agguaqatigiissitsinnermi angusaqarfiullutik.

Tuluttoornermi piginnaasanik misilitsinnermi atuarfiit tamarmik akunnattumik qaffasissusilimmik agguaqatigiissitsinnermiipput.

Kalaallisoornermi allattariarsorluni misilitsinnerit aamma piginnaasanik misilitsinnerit qaffasingaatsiartumik agguaqatigiissitsinnermiillutik allaanerusumik inissimapput, tassani illoqarfinni atuarfiit tamarmik imminnut qaffaseqatigiillutik. Paarlattuanik piginnaasanik misilitsinnertuulli allattariarsornerit, oqaluttariarsornerit appasissumik agguaqatigiissitsiffimmiillutik allaanerusumik inissisimapput, tassanittaag illoqarfinni atuarfiit tamarmik imminnut qaffaseqatigiingajallutik.

Qeqqata Kommuniani atuartut soraarummeertussat amerlanersaat projekteqarlutik suliaqarnermi qaffasissumik agguaqatigiissitsiffimmiillutik ingerlalluarputtaaq, tassani agguaqatigiissitsineq GGS-skalamut sanilliullugu pitsaasup ajunngilluinnartullu akornanni inissisimallutik.

Atuanngitsoortarneq

Illoqarfinni atuarfinni akuerisaanngitsumik atuanngitsoortarnerit ukioqqortusiartorneq malillugu sulii qaffakkiartortarput. Nalunnguarfiup Atuarfiani nukarlerni akullernilu appasinnerpaamik agguaqatigiissitsiffimmiillutik. Illoqarfinni atuarfinni allani sanilliussilluni Atuarfik Kilaaseeqqam qaffasingaatsiartumik akuerineqanngitsunik atuanngitsoorfiusarluni allaaneruvoq. Aammattaag akuerineqarluni atuanngittarneq taamaappoq, klassini alloriarfini tamani akuerineqarluni atuanngittarneq qaffasingaatsiartarluni Atuarfik Kilaaseeqqam allaanerusumik inissisimavoq. Tassani Nalunnguarfiup Atuarfiani aammaarluni akuerineqarluni atuanngiffiusarluni aallaanerusumik inissisimavoq. Tamatuma Nalunnguarfiup Atuarfiata atuartut atuanngittarnerisa apparsarneqarnissaannik suliaqarnera ajunngilluinnartumik iluatsissimavoq.

Illoqarfinni atuarfinnik sanilliussilluni nunaqarfinni atuarfinni atuartut atuanngittarnerat nunaqarfimmiit nunaqarfimmut nikerartuusoq takuneqarsinnaavoq. Nunaqarfinni akuerineqarani atuanngittarneq appasingaatsiarpoq. Tassani nunaqarfinni ataasiakkaani qaffasingaatsiarpoq takuneqarsinnaalluni. Assersuutigalugu Napasumi 1.-3. klassit 9,9 procentii akuerineqaratik atuanngitsoortarput aammalu Kangaamiut Atuarfiani 9.-10. klassit 6,4 procentii akuerineqaratik atuanngitsoortarlutik.

Sisimiuniit illoqarfimmi atuarfinnik sanilliussissagaanni nunaqarfinni akuerineqarluni atuanngittarneq qaffasilarpoq, kisianni Atuarfik Kilaaseeqqamik sanilliussigaanni, atuanngittarnermut procenti appasinneruvoq, holdenili ataasiakkaani qaffaseqatigipjaarlugu.

Pitsaassutsimik nalunaarusiami matumani ilinniartitsisut sulinngittarnerat appassisumik inissisimavoq. Ilinniartitsisunut akuerineqarani sulinngittarnerit nungungajaavissimasut, ukioq kingulleq pitsaassuseq pillugu nalunaarusiatigut anguneqarpoq. Pitsaassutsimik nalunaarusiami matumani Kangaamiut Atuarfiat aamma Sarfannguit Atuarfiat ilinniartitsisunit akuerineqarani sulinngittarnernik takkussiffiupput.

Illoqarfinni atuarfiit ingammik ataatsimut ilinniartitsisuni sulinngitsoorfiunerupput, tassani sulinngitsoortarneq 5 procent sinnerlugu inissisimalluni. Aammalu ingammik Nalunnguarfiup Atuarfiani ilinniartitsisut qaffasinnerusumik sulinngitsoortarnermut procenteqarlutik. Nunaqarfinni atuarfiit ilinniartitsisut sulinngitsoortarnerat ataatsimut appasinnerulluni.

Atuarfiit 5% sinnerlugu inissisimasut ilinniartitsisut atuartullu peqanngittarnerannik appasaaniarsarissapput.

Aningaasaqarnikkut allaffissornikkullu kingunerisinnaasai
Aningaasatigut allaffissornikkullu kingunissaqanngilaq.

Allaffeqarfiup naliliinera

Pitsaassutsimik nalunaarusiat imarisai pitsaassutsimut nalunaarusiamut ataatsimut katersorneqarput, Ilinniartitaanermut ataatsimiititaliamut kiisalu Kommunalbestyrelsimut paasisutissiissutitut oqallisissiatullu saqqummiunneqartarlutik.

Illoqarfinni atuarfinnit nunaqarfinnilu atuarfinnit tamanit pitsaassutsimut nalunaarusianik qulingiluanik allaffeqarfik tigusaqarnikuuvoq.

Pitsaassutsimik nalunaarusianik angusanillu nalilersuineramik qulinngiluaasunik eqikkaasutut pitsaassutsimik nalunaarusiamik ataatsimoorussamik suliaqartoqarnikuuvoq.

Kommunip atuarfiinut pitsaassutsimut nalunaarusiat ataatsimoortut atuarfeqarfimmi aqutsinermi sakkutut atorneqarsinnaapput, allaffeqarfimmut politikkerinullu pisariaqartutigut takunnilluarsinnaanermut pisarialimmik pilersitsisinnaammata. Ataatsimoortumik pitsaassuseq pillugu nalunaarusiaq kommunip nittartagaatigut tamanut saqqummiunneqassaaq.

Pitsaassuseq pillugu nalunaarusiat, kommunalbestyrelsip atuarfinnik nakkutilliinerani aallaavittut atorneqassapput. Taamaattumik kommunalbestyrelsip nakkutilliilluni ukiumoortumik alakarterinerani kiisalu atuarfinni siulersuisut aamma Ilinniartitaanermut ataatsimiititaliap (takuuk attaveqarnissami nakkutilliinissami pilersaarut) oqaloqatigiittarnerini pitsaassuseq pillugu nalunaarusiat atorneqartassapput.

Atuilluartuunissakkut kingunerisinnaasat

Pitsaassuseq pillugu nalunaarusiat atuarfeqarfinni suliat pillugit ersarinnerulersitseqataasarput. Pitsaassuseq pillugu nalunaarusianik siunertaasoq tassaavoq, atuarfinni ataasiakkaani kiisalu Qeqqata Kommuni atuarfeqarfiit ataatsimut isigalugit ineriartornikkut isiginiarneqarnerulernissaat. Kommunalbestyrelsip, ingerlatsiviup aamma atuarfiit akornanni atuarfinnik ataasiakkaanik nalilersuineq aamma atuilluartsuutsumik ineriartortitsineq pillugu tulleriiaakkamik uppersaanissamut suleqatigiinnerullu qulakkeerneqarnissaanut pitsaassutsimut nalunaarusiat sakkusaapput.

Innersuussut

Ilinniartitaanermut ataatsimiititaliamut innersuussutigineqarpoq:

- Atuarfiit pitsaassutsimut nalunaarusiaat aamma ataatsimoortumik pitsaassutsimik nalunaarusiaq tusaatissatut tiguneqassasut
- Ataatsimoortumik pitsaassutsimik nalunaarusiamit angusat eqqartorneqassasut
- Suliaq kommunalbestyrelsimut ingerlateqqinneqassasoq

Aalajangiineq

Tusaatissatut tiguneqarput. KB'mut ingerlateqqinneqassaaq.

Ilanngussaq

1. Ataatsimoorussamik Pitsaassuseq pillugu nalunaarusiaq 2024/25_grl
2. MA-mi ukiumi atuarfiusumi 2024-25-imi pitsaassuseq pillugu nalunaarusiaq_grl
3. Nalunnguarfiup Atuarfianit pitsaassutsimik nalunaarusiaq 2024/25_grl
4. Atuarfik Kilaaseeqamit pitsaassutsimik nalunaarusiaq 2024/25_grl
5. Qinnguata Atuarfianit pitsaassutsimik nalunaarusiaq 2024/25_grl
6. Kangaamiut Atuarfianit pitsaassutsimik nalunaarusiaq 2024/25_grl
7. Napasup Atuarfianit pitsaassutsimik nalunaarusiaq 2024/25_grl
8. Itillip Atuarfianit pitsaassutsimik nalunaarusiaq 2024/25_grl
9. Atammip Atuarfianit pitsaassutsimik nalunaarusiaq 2024/25_grl

Imm. 4.2 Atuareernerup kingorna ornittakkamiittarneq SIS

Journal nr. 51.15.00

Tunuliaqut

Imaqarniliap 8. decembari 2025-mi imm. 4.3 malitsigisaanik Ilinniartitaanermut Ataatsimiititaliami ilaasortat paaserusuppaat sunngiffimmi ornittagaq Sukorsit atuartut atuanngiffeqarneranni ammajaarnerusalernissaata kingunerisinnaasai suunersut. Sukorsit meeqqanut inuusuttunullu neqeroorutaavoq atuareernerup kingorna 2.-10. klassinut ammasartoq aammalu unnukkut ulluinarni kiisalu tallimanngornikkut arfininngornikkullu inuusuttunut 13-iniit 21-nik ukiulinnut ammasarluni, atuanngiffeqarnermilu ullaakkut nal. 10.00 ammartarluni. Atuarfiup paaqqinnittarfia 1. klassini atuartunut neqeroorutaasoq atuanngiffeqarnermi nal. 08.00 ammartarpoq. Allaffeqarfik taamaalilluni misissuivoq paaqqinnittarfik ullaakkut nal. 8-10 orninneqariarluni nal. 10.00 meeqqat Sukorsinukarlutik. Taamaalilluni Sukorsit ammasarfiinik sivitsuinissamut taarsiullugu periarfissanik misissuisoqarluni.

Maleruagassatigut tunngavissaq

Sunngiffimmi ornittagaq aammalu paaqqinnittarfiit kommunimiit sullissinikkut qaffasissusaata kiisalu Inatsisartut inatsisaat atuuttoq malillugu perorsaanikkut meeqqanut ineriartorfiusumik neqerooruteqarnerup naleqqussarnissaat. Allannguuteqartoqarsinnaavoq amerlassusiligaasut, sulinermi akunnerit malitassatigut, aningaasaqarnikkullu killiliussasut eqquutsinneqarsimappata.

Pissutsit atuuttut

Atuanngiffeqarnermi Sukorsit ammasarfii:

- Ataasinngorneq – tallimanngorneq nal. 10.00 – 17.00 meeqqanut
- Ataasinngorneq - pingasunngorneq nal. 19.00 – 22.00 inuusuttunut
- Sisamanngorneq nal. 10.00 – 16.00 meeqqanut aamma inuusuttut nal. 19.00 – 22.00
- Tallimanngorneq – arfininngorneq nal. 16.00 – 19.00 meeqqanut
- Tallimanngorneq – arfininngorneq nal. 20.00 – 24.00 inuusuttunut

Atuanngiffeqarnissamut pilersaarut 2025–2026 malillugu ullut atuanngiffeqarnissat 18-iupput (ukiaanerani, juullimi, ukiuunerani, poorskimi) aammalu aasaanerani ulluinnaat 30-t missaaniipput. Atuarfiup paaqqinnittarfia Nalunnguarfiup Atuarfianiittoq nal. 08.00 ammareertarpoq taamaalillunilu Sukorsit ammannginnerani paaqqinniffittut periarfissaalluni.

Atuilluartuunikkut aningaasaqarnikkullu kingunerisinnaasai

Atuanngiffiit tamakkerlugit Sukorsit akunnernik marlunnik ammartaliaassagaluarpat (nal. 08-10), ikinnerpaamik sulisut marluk nakkutiginnittussaapput. Kisitsisinngorlugit:

- Ullut atuanngiffiusut $48 \times$ akunnerit $2 \times$ sulisut $2 =$ sulisut tiimii ilassutitut 192
- Tiimimut aki 300 kr. missaaniissaaq, utoqqalinermusiat allallu aningaasartuutit ilanngullugit

Ataatsimut akiliinerunissaq: Ukimut 58.000 kr (missiliorlugu)

Aningaasartuutit annertusinissanut sulisut akornani tiiminut aqqissueqqinnerit tulluarsarsinnaanersut apeqqutaassapput. Tiiminik aqqissueqqinnerup ulloq naallugu sulisumik naammattunik inuttassaqaarnissaa qulakkiissavaa. Sulisunut tiimit tunniunneqartut aqqissuussatigut aalajangerneqartut malillugit nal. 10-17 akornaniippat nal. 8-10 ammartarnera immikkut ittumik sulisut tiimilerneqassapput kingunerissallugulu annerusumik aningaasartuuteqalernissaq.

Atuarfiup paaqqinnittarfia aqqutigalugu aaqqiissuteqarneq nalilersuinikkut atuilluatuuneruvoq pissutigalugu ammasarfik pioreersumik atorluaanerummat kiisalu sunngiffimmi ornittakkat akimut suleqatigiilluarnernulernissaanik nukittorsaaqataassammat. Taamak aaqqiissuteqarneq Sukorsit ammasarfiinik allannguisoqarnissanut aalajangiisoqavinnginnerani periarfissiissaaq atuangiffeqarnermi meeqqat qanoq amerlatigisut ilumut nal. 10.00 sioqqullugu atorfissaqartitsinersut paasineqassammat.

Allaffeqarfiup naliliinera

Allaffeqarfiup nalilerpaa Sukorsit ammasarfiisa allannguiffigineqarnissaat ingerlattariaqaanngikkallartoq pisariaqartitsineq malillugu takussutissaqaanngikkallarneq aallaavigalugu.

Taarsiullugulu periutsimik allamik misiliisoqarnissaa innersuussutigineqarpoq, meeqqat atuangiffeqarnermi nal. 10.00 sioqqullugu paarineqarnissamik pisariaqartitsisut atuarfiup paaqqinnittarfianiittassasut nal. 8.00-10.00, kingornalu nal. 10.00 Sukorsinukartassallutik. Aaqqiissut nalilersorneqassaaq meeqqat takkuttut, misariaqartitsisut aammalu sakkussanik atuinerit aallaavigalugit.

Innersuussut

Allaffeqarfiup Ilinniartitaanermut Ataatsimiititaliamut innersuussutigaa:

- Atuartut atuangiffeqarneranni misiligummik aallartisaasoqassasooq atuarfiup paaqqinnittarfia nal. 08.00-10.00 periarfissatut atorneqassasooq nal. 10.00 kingorna meeqqat Sukorsinukarsinnaanngorlutik.
- Aaqqiissut nalilersuivigineqassasooq meeqqat takkuttut, pisariaqartitsisut kiisalu aningaasatigut kinguneri aallaavigalugit.
- Nalilersuineq tunuliaqutigalugu siunissami qiviarneqaqqissasooq Sukorsit ammasarfiisa allanngortinnissanut pisariaqartitsisoqarnerisooq

Aalajangiineq

Innersuussutigineqartut akuersissutigineqarput.

Ilanngussaq

- UU-mi ataatsimiinnermi imaqaarniliaq ulloq 9. december 2025
- Atuangiffeqarnermi atuarfiup ornittagaanik nal. 08.00-10.00 atuilernissamut unammillernarsinnaasut aaqqiinissamullu periarfissat

Imm. 4.3 Meeqqanut inuusuttunullu 18 inorlugit ukiullit akeqanngitsumik timersorsinnaanerisa nalilersoqqinneqarnerat

Journal nr. 55.02.00

Tunuliaqut

Ilinniartitaanermut ataatsimiititaliaq 2020-mi februaarip pingajuanni aalajangiivoq, meeqqanut inuusuttunullu 18 inorlugit ukiulinnut peqatigiiffinni timersornerit akeqassanngitsut, tamatuma ukioqatigiiaani ilaasortat amerlassusaat aallaavigalugu kommuni peqatigiiffinnut ukiumoortumik tapiissuteqartassalluni. Meeqqat inuusuttullu timersornermi peqataasarnissaat aammalu sunngiffimmi timimik aalatitsinissamut ataatsimoornermullu aningaasaqarneq aporfionnginnissaa qulakkiissallugu siunertaanikuuvoq. Aaqqiissut 2020-miilli atuunnikuuvoq aammalu 18 inorlugit ukiullit ilaasortat amerlassusaat malillugit ukiumut 125.000 koruuninik missingersuuteqarluni aningaasalersugaanikuuvoq. Ukiut tallimat misilittagaqareernerup kingorna maannakkut aaqqiissut nalilersoqqinneqassaaq.

2024-mi novembarimi misilittakkat tusarniaanermilu suliniutit tunngavigalugit aaqqiissutit sunniutaanik sinaakkutaanillu ataatsimiititaliap nalilersueqqinnissanut pisariaqartitsisoqarpoq.

Maleruagassatigut tunngavigisaq

Aaqqiissut Qeqqata Kommuniata peqqissuunissamut pinaveersaartitsinermullu politikianik kiisalu meeqqat inuusuttullu akornanni peqqinnerulersitsinissap pinaveersaartitsinissallu ilaatigut peqatigiiffinnut tapiissutinik tunniussisarnissamut kommunalbestyrelsip periarfissiineranik aallaaveqarpoq.

Pissutsit atuuttut

Kommuni alloriakkaatut ilusiliineq malillugu tapiissutinik tunniussisarpoq: 200 sinnerlugit ilaasortalinnut 2.000 kr.: 10.000 kr. Ukiunut naatsorsuutinik tunniussinermut ilanngullugit peqatigiiffiit ilaasortamik alllatorsimaffiutaat tunngavigalugit tapiissutit tunniunneqartarput. Nalilersueqqinnermut atatillugu 2024-mi novembarimi peqatigiiffiit akornanni tusarniaanermik ingerlatsisoqarpoq. Akissutit ikitsunnguit tiguneqarput kisianni pitsaasumik sunniuteqarsimasutut unamminartoqarneranillu tikkuussipput. Peqatigiiffiit arlallit meeqqat inuusuttullu akornanni peqataanerulernermik misigisaqarput allat ingerlatsinermut, atortunut angalanernullu tapiissutit aningaasartuutivinnut matussusiineq ajortut ersarissaatigalugu. Ataasiakkaat "akeqanngitsumik timersorneq"-rup imarisaata killinganik ersarissaasoqarnissanut pisariaqartitsisoqartortaaq taakkartuipput.

Allaffissornikkut aningaasaqarnikkullu kingunerisinnaasai

Aaqqiissut inooqataanermut akuutitsinissamik tapertaavoq aammalu meeqqat amerlanerusut peqqinnartumik sunngiffimmi ataatsimoorfinnut peqataanissaannut periarfissiilluni. Taamaaliornikkut inuulluataanermut pinaveersaartitsinermullu tunniusseqataasinnaavoq. Aaqqiissut aningaasaqarnikkut ukiumoortumik 125.000 koruuninik sinaakkutilimmik aningaasalersorneqarpoq.

Allaffeqarfiup naliliinnera

Allaffeqarfik naliliiivoq, aaqqiissut sulii pitsaasumik siunertaqartoq aammalu timersornermut peqataanerunissamut tunniusseqataasoq.

Innersuussut

Allaffeqarfiup innersuussutigivaa, Ilinniartitaanermut ataatsimiititaliaq:

1. aaqqiissut "Meeqqanut inuusuttunullu 18 inorlugit ukiulinnut akeqanngitsumik timersorneq" pillugu nalilersuineq tusarniaanermilu akissuteqaatit tusaatissatut tigussagai, kiisalu
 - a) allannguuteqanngitsumik ingerlatitseqqissasoq taamaalilluni meeqqanut inuusuttunullu 18 inorlugit ukiulinnut tamanut sulii akeqanngitsuutinneqassasoq
 - b) ersarissaasoqassasoq tulluarsaasoqarlunilu, taamaalilluni aaqqiineq meeqqanut inuusuttunullu 18 inorlugit ukiulinnut kommunip akiligaanik ilaasortaanermut akiliummut tapiissutaasuusoq aammalu peqatigiiffiit tamakkiisumik akiliisarnisaannut, angalanissanut, unammisitsinerinut atortullu sinnerinut matussutissaanngitsoq. Ilutigitillugu siunnersuutigineqarpoq, aaqqiissutip taaguutaa allanngortinneqassasoq, taamaalilluni aaqqiissutip imarisarpiaanik peqatigiiffiillu sinaakkutaannik pitsaannerusumik ersersitsilissasoq (assersuutigalugu "Meeqqanut inuusuttunullu 18 inorlugit ukiulinnut ilaasortaanermut akiliinissamut tapiissut").

Aalajangiineq

Innersuussut tusaatissatut tiguneqarpoq akuerineqarlunilu.

Ilanngussaq

- Peqatigiiffinnit tusarniaanermi akissuteqaatit (november-december 2024)
- Ulloq 3 september 2020-mi AA ataatsimiinneranit imaqarniliaq
- Peqatigiiffinnut tusarniut

Imm. 4.4: Napasumi meeraateqarfiup ininit attartukkanit kommunip illuutaanut B-125-mut nuutinneqarnera

Journal nr. 44.02

Tunuliaqut

2025-mi decembarimili Napasumi meeraateqarfiup ingerlannissaanut A/S INI aqqutigalugu Qeqqata Kommunian inimit (B-1104, 52,8 m²) attartornikuuvoq. Attartornermi aningaasartuutit, aningaasartuutit aalajangersimasut ilanngullugit qaammammut 10.324,00 koruuninik annertussuseqarput.

Attartornermut isumaqatigiisummi § 2 naapertorlugu attartorneq qaammatinik pingasunik siumoortumik ilimasaaruteqarnikkut atorunnaarsinneqarsinnaavoq.

Illu Napasumi Meeraateqarfimmi Naasunnguit inissisimaffigisaa pitsaanngilluinnarpoq, pingaartumik ukiuunerani ilutigitillugulu ingerlatsinermut aningaasartuutit qaffasissorujussuullutik. Tamanna tunngavigalugu meeraateqarfik kommunip illuutaani B-123-mi, maannakkut atuarfimmik kommunillu allaffianik imaqtumut, inimit (ini nr. 2, 46,3 m²) nuunneqarnissaa kissaatigineqarpoq.

Maleruagassatigut tunngavigisat

- Qeqqata Kommuniani meeqqeriveqarnermut ataatsimoorussamik anguniakkat
- Meeqqanut sulit atualinngitsunut perorsaanikkut ineriikkiartuutaasunik ulluunerani neqeroorutit pillugit Inatsisartut Inatsisaat nr. 62, 20 novembari 2023-meersoq.
- Ulluunerani paaqqinnittarfiit pilersinneqartarnerat atoruminarsagaanerallu taamatullu suleqatigiinnik pilersitsisarneq pillugit Namminersorlutik Oqartussat nalunaarutaat nr. 36, 24. septembari 2020-meersoq

Pissutsit atuuttut

Meeraateqarfimmi 2026-mi januaarimi pingatsiisussanik maannakkut meeqqat pingasuupput, taakkulu meeraaqqerivimmit anginernut nuuttussaassallutik. Piffissami matumani meeqqanik nutaanik isertertoqartussaannqilaq.

Maannakkut illumi (B-1104) pissutit ukiuunerani pingaarnertut ajorluinnartuupput, piffissami tassani illu qiiannakkajuttorujussuulluni, tamannalu meeqqanut sulisunullu unamminartarluni.

2024-mi 2025-milu sulisoqarnikkut aamma ataavartumik ajornartorsiuteqartoqarpoq. Naak 2026-mi jannuaartimi sulisut naammakkaluartut, sulisuvit tassaapput aqutsisuugallartoq atakiortilu ataaseq. Napparsimasoqartillugu imaluunniit allatigut sulinngittoqartillugu paarlatsissaqanngilaq, sulisorlu kisimiilluni meeqqanik paaqqutarinneqqusaanngimmat, sulinngittoqartillugu meeraaqqerivik matoqqasariaqartarpoq.

Tamanna meeqqat ukiumikkut ineriartornissaannut kinguussinermik kiisalu angajoqqaat angajoqqaatullu akisussaataasut akornanni naammagisimaarinninnginnermik kinguneqarpoq. Tamatuma saniatigut meeraateqarfimmi suliamut tunngasutigut suliasat naammaginartumik

ingerlannissaannut periarfissaqarsimanngilaq, matumani killiffimmut naliliineq, MIIM, anguniakkat, iliuusissatut pilersaarutit pilersaarutillu allat ilanngullugit. Kivitseqatigiit aqutsisorlu nunaqarfimmiitillugit aatsaat suliasat taakku pingaarnertut suliarineqarsinnaasarput. Sulisut akornanni perorsaanikkut ingerlatsinikkullu ilisimasakinneq unamminartunut sulit tapertaapput.

Illu B-123-mi ini 46,3 m²-isut angitigisoq atorneqariaannaavoq, taannalu meeraateqarfimmi perorsaanikkut pisariaqartitanik matussusiisinnasutut nalilernerqarpoq. Nuunnikkut meeqqanut inersimasunullu avissaartisimanermik annikilisaataassaaq aammalu ataatsimoornermut, najuinissamut aammalu perorsaanikut ineriartornissamut pitsaasunik sinaakkusiissalluni.

[Atuilluartuunissakkut kingunerisinnaasat](#)

Aningaasatigut

Nuunneq attartornermut akiliummut ukiumut 140.000 koruunit missaanik sipaarutitaqassaaq. Tamatuma saniatigut ukiumut internetsimut aningaasartuutit 14.000 koruunit missaanik annertussuseqartut atorunnaassapput, meeraaqqerivik atuarfiup internetsimut attavianik atuisinnaassammat. B-123-mi inimik pequsersuinissamut ataasiartumik aningaasaliisoqarnissaa naatsorsuutigineqassaaq.

Peqqissutsimut tunngasoq

Maannakkut illup kiassartarnera naammattuaannarneq ajorpoq, tamannalu piffissat ilaanni isersimaffiginissaanik ajornartitsissalluni, taamaattumillu suliffiup avatangiisianik nuunneq pitsanngorsaassaaq aammalu meeqqat sulisullu peqqissusaanik illersuissalluni.

Perorsaanikkut

Atuarfiup kommunillu allaffiata illutaanut inissiinikkut meeqqanut kulturikkut peqqinnartumik ataqatigiisumillu inersaanissamut periarfissiissaaq, tassani meeqqat minnerit angajullernut tarrarsorsinnaassallutik kiisalu meeqqat illuata sinaakkutaata iluani meeraateqarfiup atuarfiullu akornanni suleqatigiinneq nukittorsarneqassalluni.

Ataatsimoortumik ingerlatsineq

Illu B-123-mi atuarfik kommunillu allaffiata inissisimaffigeriigaani meeraateqarfik ilanngutinneqassaaq, tamannalu ulluinnarni tatituunik eqaannerusunillu sinaakkuteqarnissamut tapertaassaaq.

[Aningaasaqarnikkut allaffissornikkullu kingunerisinnaasai](#)

Attartornermut akiliutinut kiisalu internetsimut aningaasartuuteqarunnaarnikkut ukiumut katillugit 154.000 koruunit missaanik sipaaruteqartoqarnissaa naatsorsuutigineqarpoq.

Illumut maannakkut attartukkamut attartornermut akiliutinut, innaallagissamut, imeqarnermut kiassarnermullu maannakkut aningaasartuutaapput, aningaasartuutit taakku illup qanoq inneranut (takuum ilanngussaq 1) pitsanngorsaataitaqanngitsumik ukiumiit ukiumut qaffariaateqartarput. Pissutsinut tunngatillugu INI A/S paasissutgissiissutigineqarnikuupput, illullu ajorluinnarneranut

aammalu kissassutsimut pissutsit naammanngilluinnartut pillugit uppersaaitut assinik allakkatigullu nassuiaatinik nassiussisoqarnikuulluni.

Allaffeqarfiup naliliinera

Allaffeqarfik naliliivoq, meeraateqarfiup B-123-mut nuunneqarneratigut illut initaatigut, perorsaanikkut ingerlatsinikkullu sinaakkutinik annertuumik pitsanngoriartitsissaaq, ilutigitillugulu aningaasaqarnikkut annertuumik sipaarutitaqartitsissaaq aammalu ulluinnarni ingerlatsinikkut annertuumik tatitussuseqartitsissalluni.

Innersuussut

Innersuussutigineqarpoq,

- meeraateqarfiup B-1104-mit B-123-mi ini nr. 2-mut nuutinneqarnissaa Ilinniartitaanermut ataatsimiititaliamit akuersissutigineqassasoq.

Aalajangiineq

Innersuussutigineqartoq akuersissutigineqarpoq.

Ilanngussaq

1. Piffissami attartornermut tamarmut INI A/S-imut attartornermut akiliutitut aningaasartuutinullu allanut takussutissiaq
2. Illup ajorluinnarneranut uppersaaitit

Imm. 4.5 Kangerlussuarmi sivilissusilerikkamik atorfinitsitsineq

Journal nr. 03.01.03

Tunuliaqut

Ukiuni arlaqartuni Qinguata Atuarfia ilinniartitsisutut perorsaasutullu ilinniarsimasunik sulissusiornermut atorfiniititsiinnarnissamullu ajornartorsiuteqarnikuuvoq. Tamanna atuartsinerit pitsaassutsimut ataavartitsinermullu unamminartitsivoq. Mittarfiup annikillisinneqarnerata kingorna pissutsit ajorseriarnikuupput, tamatuma nunaqarfimmi atugassarititaasunik allanngortitsinikuuvoq aammalu sulissusianik piginnaasaqarluartunik orniginarsaanissamut ajornarnerulersitsilluni. Maannakkut Qinguata Atuarfiani sivilissusilerikkamik atorfinitsitaqanngilaq. Taamaattumik Qinguata Atuarfiani sulissusiornermut atorfiniititsiinnarnissamullu suliniuteqarneranut immikkut sivilissusilerikkamik atorfinitsitsisarnermik pilersitsinissamut politikkikkut isummertoqarnissamik kissaatteqartoqarpoq.

Maleruagassatigut tunngavigisaq

- Meeqqat atuarfii pillugit Inatsisartut inatsisaat, meeqqat atuarfiinik ingerlatsinermut inuttalersuinissamullu kommunit akisussaaffiinik aalajangersaasoq.
- Ilinniartitsisutut perorsaasutullu sulisunut isumaqatigiissutit atuuttut atorfinitsitsinermilu aalajangersakkat, matumillilimmik piffissaliilluni atorfinitsitsinissamut periarfissat.
- Pisortat immikkoortortaanni sivilissusilerikkamik atorfinitsitsinissamut Naalakkersuisut aalajangersagaat, immikkoortuni avinngarusimanerusuni sulissusiornermut atorfiniititsiinnarnissamullu atorqeersinnaasut.

Pissutsit atuuttut

Mittarfiup annikillilerneqarneranit atuartut 75-iniit 53-inut apparipput. Atuarfik qulinik aalajangersimasumulisooqarpoq, taakkunaannga sisamat ilinniartitsisutut/perorsaasutut ilinniagaqartuullutik. Ukiuni kingullerni atuarfimmi sulisut annerpaamik 50 %-ii ilinniarsimasuupput. Tamatuma saniatigut immikkut atuartsisoqartarnissamik pisariaqartitsineq qaffariartorpoq. Atuarfik 19-inik immikkut pisariaqartitsisunik atuarteqarpoq, sulisullu sisamat piffissaq tamakkerlugu immikkut atuartsinermik ingerlatsisuullutik.

Tamanna tunngavigalugu nunaqarfimmi atorfinitsitsiniarnerup nukittorsarnissanut sivilissusilerikkamik atorfinitsitsinukku immikkut atorfinitsitsinermi atugassarititanik atuutlersitsinissap pisariaqarnera nalilerneqarpoq.

Atuilluartaunikkut aningaasaqarnikkullu kingunerisinnaasai

Sivilissusilerikkamik atorfinitsitsisarnermik pilersitsinermi atuilluarnerusumik inuttaqarnissamut aammalu atuartsinermi annertunerusumik patajaannersusitsinissamut tunniuseqaassasoq naatsorsuutigineqarpoq. Suliniut tapiissutitigut imaluunniit immikkut atugassaqartitsinikkut annertunerusumik aningaasartuuteqarsinnaavoq, illuatungaagullu paarlatsinut, atorfinitsitsiniarnermut sulisullu paarlakaannerinut aningaasartuutaasunut apparsaataasinnaanik nalilerneqarluni.

Aningaasaqarnikkut kingunerisinnaasai		
Aningaasartuutit suussusii	Ilinniartitsisumut ataatsimut assersuut	Ukiumut aningaasartuutit (miss.)
Sulisussarsiornermi aamma atorfimmiititsiinnarluni tapit	1.700-2.500 kr. qaammammut	20.000–30.000 kr.
Nutsernermut aningaasartuutit (ataasiartumik aningaasartuutit)	Nunaqarfimmut nuunneq	50.000–80.000 kr.
Angalanernut aningaasartuutit	Ukiumut ataasiarluni-marloriarluni angalanerit	10.000–30.000 kr.
Sulisussarsiorneq pilerisaarinerlu	Sulisussarsiorneq atorfinitsitsinermilu ingerlatsineq	5.000–15.000 kr.
Assersuutit katinneri (ukioq ataaseq)	Tapi + nutserneq + angalaneq	85.000-155.000 kr.-it missaanni

Allaffeqarfiup naliliinera

Allaffeqarfik naliliivoq, Kangerlussuarmi maannakkut sulisoqarniarneq atuarfiup ingerlannissanut atuartullu atuartinneqarnissanut neqeroorummut unamminartitsimmat, anguniagalimmik sulisussarsiornermut atorfimiititsiinnarnissamullu suliniuteqarnissamik immikkut pisariaqartitsisoqartoq.

Patajaannerusumik sulisoqarnissamut aammalu ilinniartitsisutut perorsaasutullu ilinniarsimasunik annertunerusumik orniginarsaanissamut sivilissusileriiikkamik atorfinitsitsisarnerit iluaqutaassasut.

Aaqqiissut siunissamut pilersinneqarnissaa kissaatigineqarpoq, maannakkulli atorfpingasut aaqqiissuttip iluanut ilanngutinneqarnissamik kissaatigineqartunut tapit qanoq iliuuseqarfiginissaat aamma isummerfigineqarnissapput. Ilinniartitsisunut pingasuusunut piffissamik akuersissuteqarnermit tapit tunniunneqassanersut, sivilissusileriiikkamik atorfininnermut ikaarsaassanersut aammalu ilinniartitsisut nutaat siunissami sivilissusileriiikkamik atorfinitsinneqassanersut ataatsimiititaliamit toqqarneqassaaq.

Innersuussut

Taamaammat allaffeqarfiup innersuussutigaa:

1. Kangerlussuarmi atuarfimmu ilinniartitsisunik perorsaasunillu ilinniarorniginarsaanissamut atorfeqartitsiinnarnissarluni siunertaralugit, siunissamut sivilissusileriiikkamik atorfinitsitsisarnermik periarfissiisoqartarnissamut ataatsimiititaliaq akuersissuteqassasoq.
2. Sulisooreersunut pingasuusunut tapeqartitsinissamut aammalu aaqqiissuttip atuutilerneranit tapit tunniunneqartarnissaannut ataatsimiititaliaq isummissasoq.
3. Aaqqiissummut allaffeqarfik tigussaasunik sinaakkusiissasoq, matumani aningaasaqarneq atorfinitsitsinermullu atugassarititaasut ilanngullugit inaarutaasumik akuerisassanngorlugit.

Aalajangiineq

Innersuussutigineqartut akuersissutigineqarput KB'mut ingerlateqqinneqassasoq.

Ilanngussaq

- Kangerlussuarmi pissutsit pillugit allaaserisat

Imm. 4.6 Atuarfik pillugu Inatsisartut inatsisaata allanngortinneqarnera pillugu Inatsisartut inatsisissaattut siunnersuut pillugu tusarniaassut

Journal nr. 51.08.03.00

Tunuliaqutaq

Qeqqata Kommunia Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfimmit tusarniaammik, Atuarfik pillugu Inatsisartut inatsisaata allanngortinneqarnera pillugu Inatsisartut inatsisissaattut siunnersuut pillugu tusarniaaneq (fagit ikinnerusut aamma akunnerit kiisalu nukarlernut ullut atuarfiusut ikinnerusut aamma klassit inuussutissarsiutinut tunngasut pillugit aqqissuussinerit) pillugit tigusaqarnikuuvoq.

Maleruagassatut tunngavigisat

- Atuarfik pillugu Inatsisartut inatsisaata allanngortinneqarnera pillugu Inatsisartut inatsisissaattut siunnersuut pillugu tusarniaat (fagit ikinnerusut aamma akunnerit kiisalu nukarlernut ullut atuarfiusut ikinnerusut aamma klassit inuussutissarsiutinut tunngasut pillugit aqqissuussinerit)
- Atuarfik pillugu Inatsisartut inatsisaat pillugu Namminersorlutik Oqartussat nalunaarutaat nr. 19, 27. april 2023-meersoq
- Qeqqata Kommuniani Siumut aamma Inuit Ataqtigiiit tunngaviusuk suleqatigiinnissami isumaqatigiissut 2025 – 2029

Pissutsit atuuttut

Siunnersuut Naalakkersuisooqatigiit isumaqatigiissutaani suliatigut annertusaanissaq, atugarisanik pitsanngorsaannissamik kiisalu atuarfimmi pitsaannerusumik ataqtigiinnissamik qulakkeerinninnissamik qitiusumik suliniutit piviusunngortinneqarnissaannik siunnersuut siunertaqarpoq. Inatsisip allanngortinnerani siunertaq tassaavoq tamakkiinnerusumik sammisumik sulinnermullu qaninnerusumik atuarfimmik qulakkeerinissaq, atuartut nukarlerni oqaatsitigut matematikkimilu piginnaasaat nukittorsarneqarlutik peqatigisaanillu angajullerni piviusorsiortumik kajumissaasumillu ilinniartitsinissamik neqeroortoqarluni.

Tassunga atatillugu siunnersuummiippoq nukarlernut (1.-3. klassit) iluseq nutaaq, atuartitsissutit, atuartitsinnermi tiimit ullullu atuarfiusut amerlassusii ikilisinneqassasut. Aammattaaq kommunini inuussutissarsiorneq pillugu klassinik angajullerni (9.-10. klassini) inuussutissarsiutinut sammisumik ingerlataqarnissamut neqerooruteqarnissamut periarfissaq saqqummiunneqarpoq.

Atuilluartuunissakkut kingunerisinnaasai

Ukiuni kingullerni Qeqqata Kommuniani atuarfinni meeqqat alloriarfinni misilitsinnerminni angusaat, pingaartumik matematikkimi qallunaatumilu, atuartitsissutini tamani agguaqatigiissillugu appasinnerpaamik angusaqarfiusuni, pitsanngorsarniarlugit suliniuteqartoqarsimavoq. Angusat taakku ukiumoortumik Pitsaassuseq pillugu nalunaarusiani takuneqarsinnaapput.

Maanna Naalakkersuisut nuna tamakkerlugu siunnersuuteqarput, siullertut atuarfiup aallartiffiani oqaatsitigut matematikkimilu pisinnaasat nukittorsarniarlugit. Qeqqata Kommuniata nalilerpaa atuartsissutit, atuartsissutit akunneri kiisalu atuarfiup ullui ikilisinneqassappata atuilluartsissutit annikippallaassasoq, tamannalu ernumanartortaqarpoq. Taamaattumik Qeqqata Kommuniat tusarniaanermut akissummik oqaaseqaatitalimmik suliaqarnikuuvoq.

Aappaattut siunnersuut — Angajullerni inuussutissarsiutinut tunngasumik atuaqatigiinnik pilersitsinissamut periarfissiineq atuarfinni nuannaajallaatigineqarlunilu orniginartinneqarpoq. Inuussutissarsiutinut tunngasumik atuaqatigiinnik pilersitsineq atuilluartsissutit eqqarsaatigalugu pitsaasumik kinguneqarsinnaavoq, eqaatsumik atuutilersinneqarsinnaappat.

Aningaasaqarnikkut allaffissornikkullu kingunerisinnaasai

Inatsississutit siunnersuutit akuersissutigineqarlutillu atuutilersinneqarpata, tamanna atuarfinnut tamanut aningaasatigut allaffissornikkullu kinguneqarsinnaavoq. Ilinniartitsissut suliffissamik isumaqatigiissummut sanilliullugu akunnernik ikippallaartunik atuartsissalissappata, ilinniartitsissut attatiinnarniarnissat ajornakusoorsinnaavoq oqariartuutigineqarpoq. Aappaattulli inuussutissarsiutinut tunngasumik atuaqatigiinnik aqqissuussinissaq akuerineqassappat aningaasatigut allaffissornikkullu aamma kinguneqartitsiumaarnera qularnanngilaq.

Allaffeqarfiup naliliinera

Allaffeqarfik Naalakkersuisunut akissuteqaammut missingersuummik suliaqarnikuuvoq.

Innersuussut

Ilinniartitaanermut immikkoortortaqarfiup Ilinniartitaanermut Ataatsimiititaliamut Naalakkersuisut tusarniaataannut: ‘Atuurfik pillugu Inatsisartut inatsisaata allanngortinneqarnera pillugu Inatsisartut inatsissisaattut siunnersuut pillugu tusarniaat (fagit ikinnerusut aamma akunnerit kiisalu nukarlernut ullut atuurfiusut ikinnerusut aamma klassit inuussutissarsiutinut tunngasut pillugit aqqissuussinerit) akissuteqaat toornikkuutaartaarlugu akuersissutigineqarnissaa innersuuppaa;

- Atuartsissut Kalaallisut nukarlerni atuartsissutitut pingaarnertut inissisimalernissaa oqallisigeriarlugu akuersissutigineqassasoq
- Minnerni atuartsissut Qallunaattut peerneqassanngitsoq 1. klassinili peerneqassasoq kisannili 2.-3. klassimi atuartsissutitut ingerlanneqassasoq oqallisigeriarlugu akuarineqassasoq
- Nukarlerni atuartsinermi minnerpaamik siunnersuutigineqartut oqallisigineqarlutillu akuerineqassat:
 - Ukiumut ullut atuurfiusut 180-iunatik 200-juussasut
 - Ukiumut akunnerit atuurfiusut 560-unatik 580-iussasut
 - Ukiumut sapaatip akunneri minnerpaamik 36-unatik 40-usasut
- Atuartsissut nutaaq ‘Inuunermi ingerlalluarneq’ akuerineqassasoq
- ‘Inuussutissarsiutinut tunngasumik atuaqatigiit’-nik pilersitsinissaq pitsaasumik tigulluarneqarnera, kisannili nikerartikkuminarnerusumik najukkamilu kommunerisami isumaqatigiissutit Naalakkersuisut aqqutigeqqaanngikkaluarlugit isumaqatigiissusiortoqarsinnaanissaata oqariartuutigineqarnerat oqaluuserineqarlunilu akuersissutigineqassasoq
- Og at drøfte og godkende at kommunen efterlyser en klar implementeringsplan, herunder nye lærerplaner, undervisningsmaterialer og kompetenceudvikling

- Qeqqata Kommuniata erseqqarinnerusumik atuutsitsilernissamut pilersaarummik ujartuina, tassanilu ilinniartitsisunut pilersaarutit, atuartitsinermi atortussiat piginnaanermillu ineriartortitseqqiinnissamut qulakkeeqqaarnissanut oqariatuut oqallisigineqarlunilu akuerineqassasoq

akissuteqaat Borgmesterimit aammalu Ilinniartitaanermut ataatsimiitsitaliamut siulittaasumit atsiorneqartussaavoq, Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfimmut 10. Februar 2026 nallertinnagu nassiunneqarluni.

AALAJANGIINEQ

Innersuussut (Ilinn. Ataatsimiititaliami atsiugassanngortinneqarpoq). Politikkikkut eqqartorneqarnerunissaa kissaatigineqaralarpoq, piffissaliussarli naalakkersuisoqarfimmit sivikimmat taamatut aaliangipallattoqarpoq. Pisariaqarpoq KB-mi eqqartornissaa. Tusarniutip ulluata sivitsornissaa pisariaqartinneqarpoq.

Ilanngussat

1. Qeqqata Kommuniata `Atuarfik pillugu Inatsisartut inatsisaata allanngortinneqarnera pillugu Inatsisartut inatsisissaattut siunnersuut (fagit ikinnerusut aamma akunnerit kiisalu nukarlernut ullut atuarfiusut ikinnerusut aamma klassit inuussutissarsiutinut tunngasut pillugit aqqissuussinerit) pillugu tusarniaanermut akissuteqataa.
2. Grønlandsk høringsskrivelse folkeskolelovforslag
3. Grønlandsk folkeskolelovforslag
4. Grønlandsk bemærkninger til folkeskolelovforslag

Imm. 4.7 Qeqqata Kommuniani 2025-imut ukiumut nalunaarusiaq aamma 2026-imut meeqqerivinnut ukiumut pilersaarutit

Journal nr. 44.00

Tunuliaqutaq

Meeqqeriveqarnermut allaffimmi pisortaq angajoqqaat siulersuisuusut peqatigalugit ukiumut qaangiuttumut perorsaanikkut ukiumoortumik nalunaarusiamik kiisalu ukiumut aggersumut ukiumut pilersaarummik suliaqartoqarnissanut akisussaasuvoq. Ukiumut nalunaarusiaq angajoqqaat siulersuisuusunik suleqateqarneq, sulisunut tunngassutillit aamma meeqqat inuulluataarneri takkuttarnerilu ilanngullugit ukiup ingerlanerani sulianik, ineriartortitsinermik angusassallu anguneqartut pillugit allaaserinnippoq.

Inatsisitigut tunngavigisat

Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit **Inatsisartut Inatsisaat nr. 62, 20. november 2023-meersoq.**

§ 20 imm 2:

”Kommunimi ulluunerani paaqqinnittarfiit aamma ulluunerani paaqqinnittarfiit imminnut pigisut, kommunalbestyrelsimit ingerlatsinermik isumaqatigiissuteqarfigineqarsimasut, takkuttarnermut nalunaarsuut persorsaanikkullu ukiumut pilersaarutit kommunalbestyrelsimut nassiutissavaat ullup kommunalbestyrelsimit killiliunneqarsimasup qaanginnginnerani.”

§ 24 malillugu angajoqqaat siulersuisuusut inissimanerat pillugut aalajangersakkanut inneruussisoqarportaaq, tassani angajoqqaat siulersuisuusut sammisani, ukiumut pilersaarutini malitseqartitsinernilu sunniuteqaqataasussaallutik.

Pissutsit atuuttut

Angajoqqaat siulersuisuunik atuisunillu suleqateqarneq

Qeqqata Kommuniani 2025-mi meeqqeriviit suli angajoqqaanik angajoqqaanillu siulersuisuunik pitsaasumik pissarsiffiusumillu suleqateqarnikuupput. Inatsit nutaaq angajoqqaanik siulersuisut pillugit piumasaqaateqarpoq aammalu ukiumut ikinnerpaamik pingasoriarluni ataatsimiittoqartarnissamut, tamannalu oqaloqatigiinnermik aamma perorsaanikkut suliaqarnermut ataatsimoorussamik sammiveqarnermik nukittorsaataanikuvoq.

Angajoqqaat siulersuisut ilaatigut makkununga peqataanikuupput:

- meeqqerivinni siunnersuutit sammisassanullu pilersaarusiortarneq
- perorsaanikkut ukiumoortumik pilersaarutit suliarinneranni naleqqussarnerinilu peqataaneq,
- ukiumut pilersaarutini ukiumut marloriarluni malitseqartitsineq
- meeqqerivimmi sinaakkutaasunik ilusilersuinermut pitsanngorsaattissanullu sunniuteqarneq

Perorsaanikkut ineriartortitsineq atuarfimmullu ikaarsaarneq

Meeqqat ineriartornerat aammalu meeqqerivimmiit atuarfimmut ikaarsaartarnerat nukittorsarniarlugu, sulisut meeqqanik anguniagalimmik suliaqarnikuupput makkuninnga:

- Inuttut inerikkiartorneq
- Inooqataanikkut piginnaasat,
- Oqaatsisigut inerisaaneq
- pinnguarneq, aalaneq timimillu aalatitsineq
- pinngortitamik paasinnittaaseq
- kulturikkut kinaassuseq

Meeqqat ullut tamaasa takkuttarnissaat aalajaatsumillu ulluinnaqarnissaat suli pingaartinneqarpoq, takkuttarneq meeqqap ilikkariartorneranut, inuulluataarneranut inerikkiartorneranullu toqqaannartumik sunniuteqartarmat. Tamanna pingaartumik oqaatsinut inooqataanikkullu piginnaasanut tunngatillugu meeqqanut ernunartumik takussutissalinnut atuuppoq.

Immikkut tapersersorneqarnissamut pisariaqartitsisoqartillugu susassaqtunik attuumassutilinnik MISI ilanngullu aammalu angajoqqaajusunik qanimut oqaloqateqartarnikkut suleqateqarluni sapinngisamik piaartumik iliuusissatut pilersaarutit suliarineqartarput.

2025-mi angusat

1) Nordjobb aqqutigalugu sulisoqalernikkut ingerlatsineq nukittunerulernikuuvoq

Ukiumi ineriartornerit pitsaasut ilaginikuuvaat, Qeqqata Kommunia Sisimiuni Nordjobb aqqutigalugu sulisussanik pissarsisinnaasimanera. Tamanna meeqqerivinni arlalinni malunnaatilimmik pitsaasumillu sunniuteqarnikuuvoq, imaannikuummata:

- sulisoqarnerup aalajaatsuunissanut peqataaneq
- sulisuni aalajangersimasuni artukkiisarnerup appartinneqarnera
- ulluinnarni meeqqanut pitsaasumik ingerlaannarnerup qulakkeerneqarnera
- perorsaanikkut sulinermi eqqissisimanerunermik nukissaqarnermillu pilersitsineq

Taamaaliornikkut Nordjobb-imik suliniut sulisoqarniarnikkut unamminartitanut pitsaanerusumillu ulluinnarni ingerlatsinerup qulakkeerneqarnissaanut ikiuutaanissamut sakkusaaanikuuvoq pingaarutilik.

2) Sulianut ilisimasaqarnermi suliassarpiamilu ukkataqarnerup nukittorsarneqarnera

2025-mi perorsaanikkut suliat pitsaassusilimmik ersarissumillu sammivilimmik suliarineqarsinnaanerisa qulakkeerneqarnissaat ukkatarineqarnikuuvoq. Sulisuusut inerikkiartuutaasumik ilikkagaqarnissamut avatanngiisinik aamma sinaakkutinik toqqissisimanartunik meeqqat ingerlalluarfigisinnaasaannik qulakkeerinninnissamik pilersitsinissamik anguniagalimmik suliaqarnikuupput.

3) Isumaginnikkut siunnersortimik atorfinitsitsinissaq pillugu pilersaarut

Meeqqat ilaqutariillu tapersorsorneqarnissamik pisariaqartitsisut pillugit suliniutit suli nukittorsarniarlugit 2025-mi isumaginninnermi siunnersortimik atorfinitsitsinissaq pilersaarutaavoq. Siunertaq tassaavoq:

- Siusissukkut iliuuseqarneq ilaqutariinnullu akimortumik tapersersuinerup nukittorsarneqarnissaa
- ernumassutigisat pillugit pitsaanerusumik ataqatigiissaarineq
- suliniutinik sukkanerusumik ikiuutaasinnaasunik ataqatigiinnerusunillu tunniussaqqarneq

Tamanna ilutigitiillugu isumaqqarpog, perorsaanikkut siunnersorti annerusumik "perorsaanikkut eqqortumi sulinermi" annertunersumik suliaqarsinnaanera, makku ilanngullugit:

- meeqqerivinni suliatigut ineriartortitsineq
- sulisunut ilitersuineq siunersiueqatigiinneq
- perorsaanikkut ukiumut pilersaarutini malitseqartitsineq
- perorsaanikkut imarisanik pitsaassutsikkut qulakkeerinninneq

4) Suliniut Nordplus – ilinniarneq, pinngortitamik attaveqqarneq ingerlanermilu periutsit nutaat

Qeqqata Kommuniani 2025-mi meeqqeriviit arlallit Suliniut Nordplus-imi peqataanikuupput tamatumani sulisuusut sulianut atatillugu Island-imut angalanikuullutik. Angalaneq isumassarsiassanik ilisimasanillu nutaanik annertuunik tunisinikuuvoq malitsigisaanik meeqqerivinni ulluinnarni sulinermit ilanngunneqqarnikuusunik.

Tikeraarnikkut peqataasut perorsaanikkut suliariaasitigullu periutsinik takunnileruikuupput, taakku makkuninnga nukittorsaassapput:

- meeqqat ulluinnarni pinngortitamut attaveqqarnerannut
- silamiinnikkut ilikkagaqqarneq aamma suliat tigussaasut
- meeqqat alapernaannerat, timimik aalatitsisarneq maluginiutitigut misigisaat
- meeeraqatigiinni ataatsimoorneq suleqatigiinnerlu

Nord-pluss-imik suleqateqqarnermit misilittagaq pingaarutilik tasaanikuuvoq, perorsaanikkut sulinermi pinngortitap pissarititaanik atuinnermi ukkaqqarnerulerneq. Taamaattumik meeqqeriviit annertunerusumik tulliuttunik sulissuteqalernerulerput:

- atortussanik pinngortitami nassaanik (ujaqqat, qisuaqqat, aput, issoq, naasut pilutat il.il.) atorneqqarneri
- atortussarpassuarnik sammisassanullu atortussanik pisinisamut pisariaqartitsinerup annikillinera
- avatangiisini aallaavilimmik sammisassanik nutaalliorfiusunik ilikkagaqqarnartunillu pilersitsineq
- meeqqani eqqarsartariaatsimik atuilluartsuutsumik pinngortitamullu ataqqinninnermik nukittorsaaneq

Periutsit nutaat ulluinnarni misiligarneqartarput aammalu perorsaanikkut allanngorarnerusumut ineriartortitaasumillu ingerlanermut tunniusseqataasarlutik, tamatumani meeqqat misigisatigut, aalanertigut pinngortitalu periarfissiineratigut ilinniagaqartarlutik.

5) Maniitsoq – sulisuusut piginnaasaannik ineriartortitsineq piginnaanngorsaanerlu

2025-mi Maniitsumi sulisuusut piginnaasaannik ineriartortitsinissaq piginnaanngorsaanissarluk ukkatarineqarnikuuvoq, tassunga ilanngullugit sulisut ilinniarsimasut ilinniarsimanngitsullu.

Sulisut ilinniarsimanngitsut ilinniarnermik aallartitsisinaanannut periarfissamik pilersitsinissaq iluatsinnikuuvoq, tassani ilaat SPS aqqutigalugu sivikillisamik ilinniarnermik aallartitsinnaallutik. Maannakut naatsorsuutigineqarpoq, sulisut marluk martsimi aallartissasut.

6) Maniitsoq – Sianiutit pillugit ataatsimoorussamik pikkorissarneq (Timinni)

Tamatuma saniatigut Maniitsumi 2025-mi meeqqerivinni sulisuusunut ataatsimoorussamik pikkorissanermik annertulaartumik ingerlatssisoqarnikuuvoq. Pikkorissaaneq Timinni suleqatigalugu ingerlanneqarpoq, sulisoqatigiiaat tamarmik peqataanikuullutik, makku ilanngullugit:

- perorsaasut
- isumaginninnermi ikiortit
- Eqqiaasut
- Ikiortit
- Paarlattaasartut
- Sulisut allat

Pikkorissaaneq sulisuusunut ilisimasanik nutaanik sakkusanillu atorsinnaasunik tunniussinikuuvoq, taakku ulluinnarni sulinnermi meeqqanillu naapitsinnermi atorneqarsinnaapput. Siunertaanikuusoq tasaanikuuvoq, meeqqat qisuariarnerannut, ingerlalluarnernut pisariaqartitaanullu sulisuusut paasinnittaasaasa nukittorsarneqarnissaat - kiisalu sulisut meeqqat ineriartorneranni tapersersornissaannut perorsaanikkut sakkussanik amerlanerusunik tunineqarnissaat.

Pikkorissaaneq ilaatigut sammisanut tullinnguuttunut tunngassuteqarnikuuvoq:

- Sianiutit
- Sianiutit atuuffii
- Qisuariartaatsit assigiinngitsut
- Timip tunngaviusumik pisariaqartitaa
- Timi toqqissisimasooq toqqissisimanngitsorlu
- Kajumissuseq
- Neuroception / meeqqap sianiutai
- Meeqqamik isiginnittaaseq (meeqqap isiginnittaasaa)
- Attaveqariaatsit
- Timikkut attaveqarneq sungiusaatillu atorneri
- Sammisani ulluinnarni sulinnermi atuilernissamut periutsit
- Vagusnerven
- Nammineersinnaassuseqarneq

- **Timip killissai killilersuutillu**

Piginnaasanik ineriartortitsineq sulisut suliatigut ineriartorneranni aamma meeqqat inooqataaneranni ulluinnarnilu tapersornerini suliaqarnerini pitsaasumik sunniuteqarnikuusoq nalilerneqarpoq.

2025-mi unamminartitat

Perorsaasunik amigaateqarneq sulisunilu ilinniarsimanngitsunik atuineq

Meeqquarivinni perorsaasunik ilinniarsimasunik, isumaginninnikkut ikiortinik ikiortinillu amigaateqarneq suli unamminartitsivoq. Amigaateqarneq ulluinnarni pitsaassutsimut aalajaatsuunermullu sunniuteqarpoq aammalu atorfiit amerlasuut sulisunik ilinniarsimanngitsunit matussuserneqartarput.

Tamatuma makkununga annertunerusunik pisariaqartitsinernik kinguneqarpoq:

- sulisuusunut ilinniartitsineq tapersersuinerlu
- suleriaatsinut ilutsit ersarissullu
- ulluinnarni suliassavinnik salliutitsineq

Meeqqat takkuttarnerat

Meeqqat takkuttarneranik nalunaarsuinerup takutippaa takkuttarnerit suli pitsanngorsarneqarsinnaasut, tassani aalajaatsumik peqataasarnissaq pillugu angajoqqaanik suleqateqarnerup annerulernissanut pisariaqartitsisoqarluni. Takkuttarnerit meeqqap ineriartornissanut tunngaviuvoq pingaarutilik aammalu innersuussutigineqarpoq oqaloqatigiinnikkut, ilitersuinikkut siusissukkullu tapersersuinikkut tamatuminnga anguniagalimmik suli sulisoqassasoq.

Atuilluartuunissakkut kingunerisinnaasai

Angajoqqaat siulersuisunik qanimut suleqateqarluni ukiumut nalunaarusianik ukiumullu pilersaarutinik meeqquariviit suliaqartarnerat atuilluartuusutut nalilerneqarpoq. Tamanna pitsaassutsimut, ineriartornermut inuulluataarnermullu ataatsimoortumik tunngavissamik pilersitsivoq aammalu toqqissisimanikkut inerikkiartuutaasumillu meeraanikkut nukittuumik inuiaqatigiinnik ilusileeqataasussaavoq.

Aningaasaqarnikkut allaffissornikkullu kingunerisinnaasai

Ukiumut nalunaarsiamut atatillugu toqqaannartumik aningaasaqarnikkut allaffissornikkullu kingunissaqanngilaq. Taamaattorli isumaginninnikkut siunnersortitut atuuffissamik pilersaarusiorneq ingerlatsinermi pitsaassutsimilu pitsaasumik sunniuteqartussatut suliniutitut nalilerneqarpoq.

Allaffeqarfiup naliliinera

Allaffeqarfik naliliivoq, 2025-mut ukiumut nalunaarusiaq immikkoortuni arlalinni pitsaaasumik ineriartormik takutitsisoq, taassunnga ilaallutik Nordjobb aqqutigalugu nukittunerusumik sulilersitsineq aamma suliatigut pitsaassuseqarnissamik qulakkeerinninnissamik annertuumik ukkattaqarneq. Ilutigitillugu sulii perorsaaasunik amigaateqarnermik meeqqallu takkuttarnerannik unamminartoqarpoq, sulii maluginiarneqarnissamik pisariaqalersitsisumik.

Taamaattumik nalilerneqarpoq, ukiumut nalunaarusiaq akuersissutigineqartariaqarualuartoq tusaatissatullu tiguneqarluni.

Innersuussut

Ilinniartitaanermut ataatsimiititaliamut innersuussutigineqarpoq:

- **Qeqqata Kommuniani meeqqerivinnut 2025-imut ukiumut nalunaarusiaq tusaatissatut tiguneqassasoq.**

Aalajangiineq

Innersuussut akuersissutigineqarpoq

Ilanngussaq

1. Maniitsoq ukiumut nalunaarusiat 2025 pilersaarussiallu 2026,
Man atualertussaleriffik Angaju Maniitsoq
MAN Kuunnguaq Maniitsoq
MAN Meeqqat Atammik
MAN Naja Kangaamiut
Man Naasunnguit Napasoq
MAN Paarsi Maniitsoq
MAN Aanikasik Maniitsoq

Sisimiut ukiumut nalunaarusiat 2025 pilersaarussiallu 2026,
SIS Nuka Sisimiut
Sis Nattoralinnguaq Sisimiut
SIS Naalu Sisimiut
SIS Naja/Aleqa, Sisimiut
Sis Ungaannuaq Sisimiut
SIS Nuniaffik Sisimiut
SIS Kanaartaq Sisimiut
SIS Sikkersaq Sisimiut
SIS Naasoq Sisimiut
SIS Uiaq Sisimiut
Nuka Kangerlussuaq
Naasunnguit Sarfannguaq
Nuunu Itilleq

Imm. 6.1 Qeqqata Kommuniani januarip 2026 naanerani suliffissaaleqineq pillugu paasissutissiissut

Journal nr. 65.15.00

Tunuliaqutaq

Ilinniartitaanermi ataatsimiititaliap kissaatigivaa, Qeqqata Kommuniani suliffissaaleqineq malinnaaffigerusullugu tassungalu atatillugu aalajangerpoq, suliffissaaleqineri kisitsisit ataatsimiititaliap ataatsimiinnerani paasissutissiissutitut ilaajuaannalissasut.

Maleruagassatigut tunngavissat

- Suliffissanut ilitersuisarnernut pikkorissaqqinnernullu qitiusumik ingerlatsiviit pillugit Inatsisartut inatsisaat nr. 28 decemberip 9-ani 2015-meersoq.
- Majorianik ingerlatsineri naammassisassanut isumaqatigiissut pillugu Namminersorlutik Oqartussat Qeqqatalu Kommuniani isumaqatigiissut
- Kommunit aqunneqarnerat pillugu Inatsisartut inatsisaat nr. 29 novemberip 17-ani 2017-meersoq
- Suliffissarsiorneq pillugu Inatsisartut peqqussutaat nr. 5 junip 8-ani 2014-meersoq

Pissutsit atuuttut

Ataatsimiititaliap kissaateqarnikuunera tunngavigalugu, Qeqqata Kommuniani suliffissarsiorlutut nalunaarsorneqartarnerata kisitsisitali, ataatsimiinnermi qaammatit tamaasa paasissutissiissutigalugit saqqummiunneqartassapput.

Kingullermi ataatsimiititaliap 10. december 2025 ataatsimiinnissanut, Qeqqata Kommuniani suliffissarsiorlutut kisitsisitaat 2025-imi novemberimut tunngasut saqqummiunneqarput, kisitsisillu suliffissaaleqisut Qeqqata Kommuniana tamaat isigalugu katillugu 91-lutik.

Matumani paasissutissiissummi suliffissarsiorlutut kisitsisitaai januar 2026-ip naaneranut tunngasuupput, Qeqqata Kommuniana tamaat isigalugu katillugit 196-it, oktoberip qaammataanut sanilliullugu 105-nik amerlillutik.

Suliffissarsiorlutut nalunaarsortittut aallaavigalugit suliffissaaleqinerup nikerarnera malinnaaffigineqarpoq, suliamilu matumani januar 2026-ip qaammataanni nalunaarsukkat eqitsimmi saqqummiunneqarput, tamatumani 2025-imi piffissap taamaalinerani suliffissarsiorlutik nalunaarsortissimasut kisitsisitaannut sanillersuullugit takussutissiarineqarlutik.

Eqitsit 1 – Suliffissarsiorlutut 2025-imi 2026-imilu:

	januar 2025	januar 2026	Diff.
Sisimiut	118	119	+1
Kangerlussuaq	2	4	+2
Itilleq	12	10	-2
Sarfannguit	4	1	-3
Maniitsoq	77	49	-28
Kangaamiut	9	6	-3
Napasog	3	1	-2

Ilinniartitaanermut ataatsimiititaliap, 01/26, Februar 9-ani 2026-mi ileqquusumik ataatsimiinnissanut oqaluuserisisassat

Atammik	7	6	-1
Katillugu	232	196	-36
Procentinngorlugit agguataarnerit	3,64%	3,10%	
Innuttaasut sulisinnaasut	6.380	6.323	

Eqitsit 2 - Suliffissarsiortut matchgruppenut agguataarnerat:

	Sisimiut aamma nunaqarfiit						Maniitsoq aamma nunaqarfiit					
	Arnat /Kvinder			Angutit/Mænd			Arnat /Kvinder			Angutit/Mænd		
	M1	M2	M3	M1	M2	M3	M1	M2	M3	M1	M2	M3
Januar 2026	45	2	1	83	3	0	28	4	0	29	1	0

Innuttaasut suliffissarsiortutut nalunaarsortinniarlutik saaffiginnittut nalilersuinnermi matchgruppenut agguataarneqartarput. Januar 2026-imi nalunaarsorneqartut aallaavigalugit, matchgruppeni suaassutsit najoqqutaralugit Maniitsumi nunaqarfiinilu kiisalu Sisimiuni nunaqarfiinilu kisitsisit qulaani eqitsimmi takusassiarineqarput

Sisimiuni iliuusissanik pilersaarutit januarimi 14-it sananeqarlutik.

Maniitsumi iliuusissanik pilersaarutit januarimi 5-at sananeqarlutik

Eqitsit 3 – Piginnaanngorsartut, flexjobertut allatulluunniit sulisinneqartut:

	Piginnaanngorsarneq	Flexjob	Suliffimmik misiliineq	Qulaajaaneq/vm-forløb
Sisimiut	2	12	0	14
Maniitsoq	2	1	0	0

Qaammatip naanerini suliffeqarfinnut assigiinngitsunut suliffissarsiortunik innersuussinerit eqitsimmi ataani takusassiarineqarput.

Eqitsit 4 – Suliffeqarfinnut suliffissaaleqisunik innersuussinerit 2026:

Suliffinnut innersuussinerit	Jan.	Feb.	Ma r.	Apr.	Juuli	Juni	Juli	Aug.	Sept.	Okt.	Nov.	Dec.
Sisimiut	3											
Maniitsoq	15											

Aningaasaqarnikkut allaffissornikkullu kingunerisinnaasai

Suliffissaaleqinerup aningaasatigut kingunerisinnaasaai tassaasinnaapput ilaqutariinnermi immikkoortortami pisortatigut ikiorsiissutiniq tunniussisarneq aammalu majoriami suliffissarsiortunut ikiorsiissutiniq tunniussisarneq. Taamaakkaluartoq suliffeqarfinnik suleqatigiinninnerup annertusarneqarnissaanik ukkassinerit suli ingerlanneqarput, innuttaasut suliffissarsiortutut nalunaarsortissimasut suliffinni sungiusartinneqartarnissaat aammalu piginnaanngorsartinneqartarnissaat annertunerulersinniarlugit taamaalilluni imminut pilersorsinnaaneq annertunerulersinniarlugu aammalu Qeqqata Kommuniani aningaasatigut kingunerisinnaasat eqqarsaatigalugu ikiorsiissutiniq tunniussisarnerit minnerulersinniarlugu.

Allaffeqarfiup naliliinera

Allaffeqarfiup nalilerpaa suliffissaaleqinerup appartinniarnerni suliniutit ingerlanneqartut naammaginnartut, taamaattorli pingaaruteqartoq, suliniutit ingerlannerini suliffeqqarfiit suleqatigilluarneqarnissaat. Taamaalluni innersuunneqarpoq suliffissaaleqineq pillugu paasissutissiissut tusaatissatut tiguneqassasoq.

Innersuussut

Ilinniartitaanermi ataatsimiititaliamut innersuussutigineqarpoq, suliffissaaleqinerup januar 2026-ip naaneranut killiffia pillugu paasissutissiissut tusaatissatut tigoqqullugu.

Aalajangiineq

Innersuussut tusaatissatut tiguneqarpoq

Ilanngussat

1. Suliffissaaleqisunut kisitsisinik nalunaarsugaq, januar 2026-ip naaneranut atuuttoq
2. matchgruppenut agguataarinerit januar 2026-ip naaneranut atuuttut.
3. matchgruppenut agguataarinerit december 2025-ip naaneranut atuuttut.
4. Ilinniarnermut kisitsisinik nalunaarsugaq januar 2026-ip naaneranut atuuttut.
5. Ilinniarnermut kisitsisinik nalunaarsugaq december 2025-ip naaneranut atuuttut.

**Imm. 6.2 Avataanit tikisitsilluni sulisussarsiornermik, december 2025 aamma
januar 2026-imi qinnuteqaatinut tunngatillugu, ataatsimiititaliap
siulittaasuanit aalajangiiffigineqartut pillugugit paasissutissiissut**

Journal nr. 67.01.03

Tunuliaqutaq

Suliami matumani paasissutissiissutitut saqqummiunneqarput, Qeqqata Kommuniani suliffeqarfinnit avataanit tikisitsilluni sulisussarsiornermut tunngatillugu qinnuteqaatit, ataatsimiititaliap siulittaasuanit december 2025 aamma januar 2026-imi suliarineqarlutik aalajangiiffigineqartut.

Maleruagassatigut tunngavissat

- Kalaallit Nunaanni Suliffissarsiorlutik killilersimaarnissaat pillugu Namminersorlutik Oqartussat Nalunaarutaat nr 24, 26 september 1993-imeersoq.
- Kalaallit Nunaannut suliffissarsiorlutik killilersimaarnissaat pillugu Inatsisartut inatsisaat nr. 27, 30. oktobari 1992-imeersoq.
- Kalaallit Nunaanni Suliffissarsiorlutik killilersimaarnissaat pillugu inatsisartut inatsisaata allanngortinneqarnera pillugu Inatsisartut inatsisaat nr. 27, 9. december 2015-imeersoq (sulisisut jobportal-imik atuinerat).
- Kalaallit Nunaannut suliffissarsiorlutik killilersimaarneqarnissaat pillugu Inatsisartut inatsisaata allanngortinneqarneranik Inatsisartut inatsisaat nr. 23, 28. november 2016-imeersoq (Atuuffia aamma ilinniakkat allat, nalunaarusiortarnek il.il.)
- Kalaallit Nunaannut suliffissarsiorlutik killilersimaarnissaat pillugu Inatsisartut inatsisaata allanngortinneqarnera pillugu Inatsisartut inatsisaat nr. 22, 13. november 2017-imeersoq (Aalajangiinissamut killigitat)

Pissutsit atuuttut

Majoriami qinnuteqaatinik tigusaqartoqartillugu suleriaatsimi pisarneq malillugu nivinngaavitsigut nittarsaanneqartarput kommuninilu tamani suliffissarsiuussisarfinnut nassiussuunneqartarlutik. Tamanna ilutigalugu Maniitsumi Sisimiunilu suliffissarsiorlutik nalunaarsorsimaffiat aamma misissorneqartarpoq.

Maniitsumi avataanit sulisussarsiorluni qinnuteqaatit marluk december 2025-imi aammalu januar 2026-imi qinnuteqaatit 31-it (tamatumani suliami ataatsimi RG-mit sivitsuinerit inunnut 28-inut tunngasoq) suliarineqarlutik aalajangiiffigineqarput.

Sisimiuni avataanit sulisussarsiorluni qinnuteqaatit 27-it januar 2026-imi suliarineqarlutik aalajangiiffigineqarput.

Eqitsimmi ataani december 2025-imi aammalu januar 2026-imi avataanit sulisussarsiorluni qinnuteqaatit suliarineqarlutik aalajangiiffigineqartut takuneqarsinnaapput:

***Ilinniartitaanermut ataatsimiititaliap, 01/26, Februar 9-ani 2026-mi ileqquusumik
ataatsimiinnissaanut oqaluuserisisassat***

Suliffeqarfik qinnuteqartoq:	Atorfik qinnutigisaq:	Ulloq tigussiffik:	Piffissaq qinnuteqaatigineqartoq:	Aalajangiineq:
Maniitsoq Fish, Maniitsoq	Tunisass. sulisoq	29/10-25	01-02-26 – 31-01-28	Akuerineqarpoq
Kalaallit Nunaanni Brugseni	Pisinniarfimmi sulisoq	21-11-25	01-01-26 – 31-12-27	Akuerineqarpoq
Nipi FM Maniitsoq ApS	Igaffimmi aqutsisoq	02-12-25	01-03-26 – 29-02-28	Akuerineqarpoq
Royal Greenland A/S, Maniitsoq	Sivitsuinerit 28 pers.	08-12-25	01-01-26 – 31-12-27	Akuerineqarpoq
Leong Entrepise ApS, Maniitsoq	Sivitsuineq igasoq	29-12-25	27-02-26 – 26-02-28	Akuerineqarpoq
LH Spjæld og byg ApS	Betonilerisoq	05-01-26	14-01-26 – 21-06-26	Akuerineqarpoq
Royal Greenland A/S, Sisimiut	Tunisass. sulisoq	08-12-25	01-01-26 – 01-01-28	Akuerineqarpoq
Royal Greenland A/S, Sisimiut	Tunisass. sulisoq	08-12-25	01-01-26 – 01-01-28	Akuerineqarpoq
Royal Greenland A/S, Sisimiut	Tunisass. sulisoq	08-12-25	01-01-26 – 01-01-28	Akuerineqarpoq
Royal Greenland A/S, Sisimiut	Tunisass. sulisoq	08-12-25	01-01-26 – 01-01-28	Akuerineqarpoq
Royal Greenland A/S, Sisimiut	Tunisass. sulisoq	08-12-25	01-01-26 – 01-01-28	Akuerineqarpoq
Royal Greenland A/S, Sisimiut	Tunisass. sulisoq	08-12-25	01-01-26 – 01-01-28	Akuerineqarpoq
Royal Greenland A/S, Sisimiut	Tunisass. sulisoq	08-12-25	01-01-26 – 01-01-28	Akuerineqarpoq
Royal Greenland A/S, Sisimiut	Tunisass. sulisoq	08-12-25	01-01-26 – 01-01-28	Akuerineqarpoq
Royal Greenland A/S, Sisimiut	Tunisass. sulisoq	08-12-25	01-01-26 – 01-01-28	Akuerineqarpoq
Royal Greenland A/S, Sisimiut	Tunisass. sulisoq	13-01-26	13-01-26 – 12-01-28	Akuerineqarpoq
Royal Greenland A/S, Sisimiut	Tunisass. sulisoq	13-01-26	13-01-26 – 12-01-28	Akuerineqarpoq
Litpersona Greenland ApS, Sisimiut	Sanasoq	02-12-25	05-01-26 – 05-01-28	Akuerineqarpoq
Litpersona Greenland ApS, Sisimiut	Sanasoq	02-12-25	05-01-26 – 05-01-28	Akuerineqarpoq
Litpersona Greenland ApS, Sisimiut	Sanasoq	02-12-25	05-01-26 – 05-01-28	Akuerineqarpoq
Litpersona Greenland ApS, Sisimiut	Sanasoq	02-12-25	05-01-26 – 05-01-28	Akuerineqarpoq
Litpersona Greenland ApS, Sisimiut	Sanasoq	02-12-25	05-01-26 – 05-01-28	Akuerineqarpoq
Litpersona Greenland ApS, Sisimiut	Sanasoq	02-12-25	05-01-26 – 05-01-28	Akuerineqarpoq
Litpersona Greenland ApS, Sisimiut	Sanasoq	02-12-25	05-01-26 – 05-01-28	Akuerineqarpoq
Litpersona Greenland ApS, Sisimiut	Sanasoq	02-12-25	05-01-26 – 05-01-28	Akuerineqarpoq
Litpersona Greenland ApS, Sisimiut	Sanasoq	02-12-25	05-01-26 – 05-01-28	Akuerineqarpoq
Litpersona Greenland ApS, Sisimiut	Sanasoq	02-12-25	05-01-26 – 05-01-28	Akuerineqarpoq
Golden Seal International ApS	Igasoq	29-12-25	08-03-26 – 07-03-28	Akuerineqarpoq
Hotel Sisimiut ApS	Hospitality assistent	05-01-26	01-03-26 – 29-02-28	Akuerineqarpoq
Hotel Sisimiut ApS	Hospitality assistent	05-01-26	01-03-26 – 29-02-28	Akuerineqarpoq
Hotel Sisimiut ApS	Hospitality assistent	05-01-26	01-03-26 – 29-02-28	Akuerineqarpoq
Hotel Sisimiut ApS	Hospitality assistent	05-01-26	01-03-26 – 29-02-28	Akuerineqarpoq
Kalaallit Nunaanni Brugseni	Pisinniarfimmi sulisoq	05-01-26	01-02-26 – 31-01-28	Akuerineqarpoq

Qinnuteqaatit Ilinniartitaanermi ataatsimiititaliap siulittaasuanut ataatsimiititaliaq sinnerlugu aalajangigassanngorlugit saqqummiunneqarnikuupput, suliamullu innersuussutigineqartoq tunngavigalugu aalajangiiffigineqarnikuullutik.

Matumani suliami qinnuteqaatit ataatsimiititaliamut paasissutissiissutigineqarput, qinnuteqaatinik suliat ataatsimiititaliap siulittaasuanit aalajangiiffigineqartut ilanngussatut (bilag) ilaatinneqarlutik.

Atuilluartuunissakkut kingunerisinnaasai

Atuilluartuunerunngilaq nuna avataanit tikisitanik sulisoqarnissamik isumalluuteqartariaqalersimappat, kisiannili nunat assigiinngitsut avataanit tikisitsilluni sulisoqartarneq kiffartuussinerup iluani atugarivaat. Ataatsimut isigalugu ukkanneqarnerusariaqarpoq, Qeqqata Kommuni suliffeqarfiit eqqarsaatigalugit nunaqavissunik sulilersitsisarnerup pitsaanerulernissaa anguniarlugu suleqatigilluarneqartariaqarput.

Aningaasaqarnikkut allaffissornikkullu kingunerisinnaasai

Kommuni qinnuteqaatinik suliaqartarneq qinnuteqartunullu akissuteqarneq, aningaasatigut allaffissornikkullu annertunerusumik kingunerluuteqanngilaq.

Allaffeqarfiup naliliinera

Allaffeqarfiup nalilerpaa, suliat ileqquusooq malillugu suliarineqarsimasut Ilinniartitaanermilu ataatsimiititaliap siulittaasuanut ataatsimiititaliaq sinnerlugu aalajangiiffigisassanngorlugit ingerlateqqinneqarsimasut. Suliat matumani ataatsimiititaliamut paasissutissiissutitut saqqummiunneqarput.

Innersuussut

Ilinniartitaanermi ataatsimiititaliamut innersuussutigineqarpoq, avataanit tikisitsilluni sulisussarsiornermut tunngatillugu qinnuteqaatit, december 2025-imi aammalu januar 2026-imi suliarineqartut siulittaasup aalajangiiffigisimasai pillugit paasissutissiissut tusaatissatut tigoqqullugu.

Aalajangerneq

Innersuussut tusaatissatut tiguneqarpoq

Ilanngussaq

1. 1-6 Suliat qinnuteqaatinut tunngasut Maniitsumeersut december 2025 & januar 2026
2. 7-33 Suliat qinnuteqaatinut tunngasut Sisimiuneersut januar 2026

Imm. 6.3 Illoqarfimmi atuarfimmut ornigutinngikkaluarluni alimasissumit atuartinneqarnissamut toqqaanissamut periarfissaq.

Journal nr. 51.08.01

Tunuliaqutaq

Ataatsimiititaliap immikkoortumik ”Alimasissumik atuartitseriaatsimut nuna tamakkerlugu iliuusissatut pilersaarummut missingiut’ pillugu tusarniaassumut akissuteqaatip ilisimatitsissutigineqarnera 8. december 2025-mi ilinniartitaanermut ataatsimiititaliap ataatsimiinnermini suliarineranut nangillugu, ilinniartitaanermut ataatsimiititaliami ilaasortaq Juliane Enoksen illoqarfiup atuarfianut ornigutinngikkaluarluni alimasissumik atuartinneqarnissamut toqqaanissamut periarfissaqarnera soq paasissutissiissutigineqarnissaa kissaatigivaa.

Suliap saqqummiunneqarnerata siunertaraa immikkoortumut pisinnaatitaaffiit periutsillu atuuttut, matumani alimasissumik atuartinneqarnissamut atuartitsinermut neqeroorutitut atuartumit imaluunniit angajoqqaamit toqqaarneqarsinnaanera ilanngullugu paasissutissiinnissaq.

Maleruagassatigut tunngavigisaq

Atuarfik pillugu Inatsisartut inatsisaat pillugu Namminersorlutik Oqartussat nalunaarutaat nr. 19, 27. aprili 2023-meersoq

Pissutsit atuuttut

Inatsisitigut tunngavigisat

Atuarfik pillugu Naalakkersuisut nalunaarutaat naapertorlugu Kalaallit Nunaanni atuartinneqartussaataitaaneq atuuppoq, pinngitsoorani atuartussaataitaanerunngitsoq.

Atuartinneqartussaataitaanerup malitsigivaa, meeraq/inuusuttoq atuartinneqarnermik tunineqarnissamut pisinnaatitaaffeqarluni pisussaaffeqartoq:

- meeqqat atuarfiani imaluunniit
- atuartitsinermi allami, meeqqat atuarfianni nalinginnaasumik piumasaqaatinik malinnittutut kommunalbestyrelsimit nalilerneqarsimasumi.

Taamaalillutik angajoqqaat meeqqami allatut atuartinneqarnissaannik, matumani angerlarsimaffimmi atuartinneqarsinnaanissaanik toqqaasinnaallutik, tassa tamanna kommunalbestyrelsimut nalunaarutigineqarpat aammalu atuartitsissut akuersissutigineqarlunilu kommunimit nakkutigineqarpat.

Meeqqat atuarfiani alimasissumik atuartitsineq

Kalaallit Nunaanni meeqqat atuarfiini alimasissumik atuartitsineq perorsaanikkut

aaqqissuussinikkullu sakkutut atorneqartarpoq, pingaartumik nunaqarfinni minnerusuni aammalu

najukkami ilinniartitsisutigut naammattunik sulisussaaleqinermi atorneqartarluni. Tamanna assersuutigalugu kommunip imaluunniit nuna tamakkerlugu suliniuteqarnikkut atuarfimmit allamit digitalimik atuartitsisoqartarluni.

Pisuni taakkunani kommunimit imaluunniit atuarfimmi aqutsisunit aaqqissuussinikkut alimasissumik atuartitsineq nalinginnaasumik atuartitsinermut ilanngunneqartarpoq.

Atuartitseriaatsimik toqqaaneq

Meeqqat atuarfia pillugu inatsimmi imaluunniit oqaaseqaatini attuumassuteqartuni atuatumik angajoqqaanilluunniit atuarfimmu orniguteqqaarani alimasissumik atuartinneqarnissamut toqqaanissamut piumasaqaatitaqanngitsumik pisinnaatitsissumik peqanngilaq.

Aallaavittut tulluuttut akornanni toqqaasoqarsinnaavoq:

1. Atuarfimmi nalinginnaasumik atuartitsinermut peqataaneq, matumani kommunip imaluunniit atuarfiup aaqqissugaanik ungasissumit atuartitsinerusinnaasut, imaluunniit
2. Allatigut atuartitsineq (ass. angerlarsimaffimmi atuartinneqarneq), nalunaarutigineqarneranit atuartitsisussaataitanermik naammassinninnermit akuersissutigineqartoq.

Taamaalilluni alimasissumik atuartitsineq atuatumit imaluunniit angajoqqaanit toqqarneqaannarsinnaanani, kommunimiilli suliatigut aaqqissuussaaniikkullu naapertuunneranik nalilerneqarneratigut atorneqarsinnaasuulluni.

Atuilluartuunissakkut kingunerisinnaasat

Pisuni immikkoortuni alimasissumik atuartitsinissamut atuarfik angajoqqaanik isumaqatigiissuteqarsinnaavoq, inatsisilli iluani taamaallaat pisinnaavoq aammalu toqqagassaannaanani imaluunniit atuartinneqarnermut ataavartumik taartaasusnaanani, aatsaat allatut atuartitsinermik akuersissuteqartoqarsimappat.

Immikkut eqqarsaatigisassat (ass. suussusiliineq, atugarissaarneq peqqinnerluunniit)

Pisuni atuortoq:

- piginnaasamigut appassisuuneranik suussuliivigineqarsimappat,
- inuttut atukkatigulluunniit unamminartitsisuuppat,
- sivisuumik napparsimasuuppat,
- atuarumajunnaarsimappat imaluunniit atugarliorpat,

atuatumut pitsaanerpaatut aammalu suliatigut imminut illersorsinnaasutut nalilerneqarpat, atuarfik - perorsaaniikkut aaqqissuussinermut ilaatillugu – **utaqqiisaasumik imaluunniit atuartitsinermut neqeroorummumut ilaatillugu alimasissumik atuartitsinermik atuisinnaavoq.**

Tamanna ima pisinnaavoq:

- immikkut perorsaaniikkut ikiorsiinerup ilaatut,
- ataasiakkaanut aaqqissuussaasumik atuartitsinermik ingerlatsineq, imaluunniit
- atuarfimmu ornigulluni atuariatortalernissamut naleqqussaagallartumik ingerlatsineq.

Nalinginnaasumik perorsaanikkut isiginninnikkut alimasissumik atuartitsisarnerup
toqqarneqarneratigut pitsaaqutai akornutaalu

Annertussusia	Pitsaaqutit	Akornutissat
Inooqataanikkut piujuartitsineq	- Atuartitsinermut naligiimmik ammaaneqarnerisa annertusinerat - Atuartut peqqissutsikkut imaluunniit inooqataanikkut unamminartitaqartunik tapersiinerusinnaavoq. - Atuanngitsoortarnernik taamaatitsisarnermillu annikillisaataasinnaavoq	- Inooqataanermit mattusimaleratarsinnaaneq - Ataatsimoornernut atugarissaarnermullu nukillaarsaataasinnaavoq - Oqaatsitsigut kulturikkullu annikinnerusumik akuulerneq
Perorsaanikkut pitsaassuseq	- nuna akimorlugu ilinniartitsisunik ilinniarsimasunit atuisinnaaneq - Immikkut ittumik atuartitsisinnaanermut periarfissaq	- Atuartut annertuumik nammineersinnaanerinek piumasagaatitaqarpoq - Klassimik aqutsinermut assigiinngissitaarnermillu unamminartitsineq
Aningaasaqarneq	- Ilinniartitsisutigut nukissanik atorluaaneq - Paarlatseqartitsinissamut aammalu aallartitsisarnissamik pisariaqartitsinerup annikinnerunera	- Qarasaasiatigut atortunut attaveqaatinullu aningaasaliissuteqarneq - Ikiorneqarnermut piginnaasanillu ineriartortitsinernut aningaasartuutit - Akissarsianut aningaasartuutit amerlanerit qaffariaateqaratarsinnaaneri. - Nukissiuutinek annertunerusumik atuineq
Avatangiisit	- Assartuineq annikinnerusoq	- Qarasaasiatigut pilersitsiortornermit eqqaanermiillu avatangiisinik artukkiineq
Aaqqissuussaaneq	- Atuartitsinermik eqaannerusumik aaqqissuussineq - Napparsimanermi imaluunniit ilinniartitsisussaaleqinermi tatitussuseqarneq	- Ataqatigiissaarinissamut nakkutiginninnermik annertunerusumik pisariaqartitsineq - Sinaakkutit akisussaaffiillu ersarissuunissaannut piumasagaateqarneq
Siunissaq ungasinnerusoq eqqarsaatigalugu piujuartitsineq	- Atuarfinnik nunaqarfinnillu minnerusunik nukittorsaataasinnaavoq - Digitalimik piginnaasatigut ineriartortitsinissamik tapersersuissaaq	- Najukkani atuarfiit avatangiisiinik annikillisaratarsinnaanerat - Atuartitsinermi pitsaassusaata assigiinngiaaratarsinnaanerat

Aningaasaqarnikkut allaffissornikkullu kingunerisinnaasai

Aaqqiissut atuartunit angajoqqaaniillu alimasissumik atuartitsinermik toqqaasitsisinnaaneq kommunimut meeqqallu atuarfianut arlalitsigut aningaasaqarnikkut unamminartitsisinnaavoq/-ssaaq, pingaartumik toqqaasinnaatitsinermi pilersaarusiornissamut nukissanillu atuinissamut siumut isiginnissinnaanermut annikilliliissammat.

Assersuutigalugu:

1. Annertoqataanik sipaarutitaqanngitsumik aalajangersimasunik aningaasartuutit qaffariaateqarneri Atuarfiup tulluuttunut aalajangersimasumik aningaasartuutai:

- naak atuartut ataasiakkaat alimasissumik atuartitsinermik toqqaagaluartut illutaata ingerlanneqarnera, kiassarneq aserfallatsaaliinerlu, aqutsineq allaffissornerlu ingerlaannartussaapput. Alimasissumik atuartitsinermi ininik imaluunniit atuartut amerlassusaat naapertorlugu sulisoqarnissamik pisariaqartitsinermut annikillisaataasussaangimmat, sipaaruteqarnissamut killilimmik taamaallaat piviusunngortitsisoqarsinnaavoq.

Unamminartut: Marloqiusamik aaqqissuussaaneq, tassani atuarfik ungasissumit atuartitsinerlu peqatigitillugit aningaasalersorneqarnissaat.

2. Marloqiusamik sulisoqarneq ilinniartitsisunillu nukinnik pitsaanngitsumik atuineq
3. Atuartut amerlassusaasa siumut ilisimanissaa ajornartoq aammalu pilersaarusiornissamut nalornissuteqarneq
4. Qarasaasiaqarnermi attaveqaateqarnermut ingerlatsinermullu aningaasaliineq
5. Immikkut perorsaanermut tapersersuinerlut annertunerusumik aningaasartuuteqarneq
6. Allaffissornikkut inatsisilerinikkullu aningaasartuuteqarneruneq
7. Atuarfiit akornanni aningaasaqarnikkut equngaleritsineq

Allaffeqarfiup naliliinera

Nalilerneqarpoq, meqqat atuarfii pillugit inatsit eqaatsumik atuartitseriaaseqarnissamik periarfissiisoq, matumani alimasissumik atuartitsineq ilanngullugu, periarfissarli taanna kommunip atuarfiullu atuartitsinermik pilersaarusiorninerlut pingaarnertut atuutilersitsinerusoq. Atuartoq atuarfimmit atuartitsinissamut neqeroorutaasumit alimasissumik atuartinneqarnissamik toqqaaginnarsinnaaneranut inatsit tunngaviliinngilaq.

Meeqqat atuarfianut ornigutigani atuartinneqarnissamik kissaateqartoqarpat, tamanna atuartinneqarnissamut sinaakkutip akuerisaasut iluini pissaaq, matumani kommunaaelbestyrelsimit nakkutigineqartumik angerlarsimaffimmi atuartinneqarneq ilanngullugu.

Innersuussut

- Kalaallit Nunaanni meeqqat atuarfiini ungasissumit aturtitsineq atuartunut ataasiakkaanut allatut periarfissatut toqqagassaanginneranik kisiannili kommunip atuarfiullu suliatigut naliliineratigut atorsinnaaneranik tunngaviliisoqassasoq.

- ilisimatitsissut tusaatissatut tiguneqassasoq.

Aalajangiineq

Tullianimut kinguartippoq (**allagaq ilanngusassaq ilanngutissaaq**)

Ilanngussaq

%

Imm. 7.1 Tamalaat.

Ataatsimiinneq naavoq nal. 14:12